

GUITS NE GLO PXEEL PABL LO

ZHA CORINT

1 ¡Diuzh to grëse to!

Naa nac Pabl, ible Dios bzooblo naa znu quiayun naa xtsiin Jesús. Grop no bets ne Sóstenes rquiaa guits rii rxeel no lo to.

²Laaw ziaad lo to i, grëse to ne nac to zha ne ngable xnëz Dios no to guiedz Corint i, nac to zha ne bredz Dios ngab lo me, psanmbe me to zeene laa to bliladz Jesús; zigne psanmbeque me grëse miech ne no dib lo guidzliu, zha ne bliladz Jesús, men ne rnabey ne grëse ne.

³Dios men ne nac Pxoze ne, ni Jesús men ne rnabey ne, me gacniën to, me glu lo to ganle pa lotaa noxco me to; zeena peet tsienied guic to.

⁴Gzataa zeene rzodiidznie naa Dios, rded naa xquizh lo me por grëtaa ncuane zineedz me lo to, niina ne laa to rliladz Jesús. ⁵Sac gon porne rliladz to Jesús, blactaa ziyunlay me lo xquielmban to, noyacniën me to quiayoguicraa to zha nac zhiwseed me, rien to zha gnee tow lo miech. ⁶Rlu zienal to mine nac Xtiidz Jesús, zigne binse tow, ⁷gacxe waa bneedz Dios grëtaa guielbiini lo to, zeena guien to zha gban to, laga quiambëz to gdzin dze ne guiaad Jesús men ne rnabey ne. ⁸Ni Dios nac men ne gacniën to tiblrique gac to lo Xtiidz Jesús, zeena ni tib falt rapde to gal dze co. ⁹Sca nac xtiidz me, ni mesi gon ctsëed me mine rnee me, ible laa me bredz to gacnie to Xpëed me Jesús, men ndzon ne rnabey ne.

¹⁰Gacxe waa bets, bzian, laa naa rso diidz lo to niowse golgac, tsodildraa to. Ine tipse golgac grë to, tel pe nac dziin ne gun to, tel pe rzac to, tipse golnee. Ne nligaa golgona, zig nac zeene Jesússhal noso diidz rii lo to. ¹¹Sac gon në tib zhalidz Cloé lo naa nodillsa to i; ¹²no to dien cho xnëz ngab to. No to rnee: “Xnëz Pabl no naa”; riasaque zha ne rnee xnëz Apol no zho, rrieequiagaa zha ne rnee xnëz Pedr no zho; haxta no zho rzac zhase nac zha ne nlipaa no xnëz Jesús. ¹³Ne squi rac to, ¿pe rzac to dzigo squi nzian lë nac Jesús? Zha ne rnee xnëz Pabl no zho, ¿pe niacxe naa pquia lo cruz gozh xtol zho?, ¿te brobnis zho ye par ygab zho lo naa?

¹⁴¡Xquizh Dios led naad pchoobnis to grë to, lëese chop zha ne pchoobnis naa nac Crisp ni Gay! ¹⁵Zeena tsod pe nacne guiab to xnëz naa ngab to, sac naa pchoobnis to. ¹⁶Ah, ni naaque gon pchoobnis grë menlidz Stef. Bod lëese

zha ne pchoobnis naa ga, ¹⁷sac gon pxeeldaxe Jesús naa waa cchoobnis naa miech, sinque laa me pxeel naa cseed naa zho gacnan zho zha grieelo laa zho lo dol. Haxta bod ligase bzhaac to mine bialne naa lo to, sac ib zanaid naa pe guielrac, pe diidz ngan ne gne naa; sac nacda gleynie miech zha rnee naa, sinque gliladz zho cho nac Jesús, pe nacne gut me lo cruz.

Diosse nac men ne rien

¹⁸Min co nagon noxco naa, maase niicle no grë zha ne rzac ncuane paat rquiind ga been Jesús gut me lo cruz, per lëë zha co nole nëz ne nitlo zho; sangue ne ne nac ne zha ne psilaale me lo dol, ndion ne ganle ga blu pa lotaa nac poder ne rap Dios. ¹⁹Noyaca zigne zhobneeque lo Xtiidz Dios, zeene rëb me:

Znitlo naa grë guielrac ne rzac zho csilaa zho,
niicle rzac zho mazdraa zhooba guic zho,
ni lalnu yquiinda.

²⁰Ni nligaaw, grë zha rac, grë zha rien, grë zha ne rzob dien cho nroobraa rac, ib blud grë zhiwseed zho ga lo zho zha csilaa Dios zho, chogaa nac Dios. Ga blu Dios ganle lega nacse grë guielrac ne no lo guidzliu rii. ²¹¡Diosse nac men ne rien! Bien me grieelod gunbey miech me por xquielrac zho, nacne bnabey me zha ne dib zdoo gliladz xtiidz me, zha co csilaa me; niicle ne rzhidznie miecha, rzac zho ncuane paat rquiinda.

²²Zig nac grë zha Israel, grë zha Gres ncuane paat rquiinda rzac zho. Grë zha Israel, racladz zho ganlo zho grë milagr nroob par glu ne diidzliw; laa zha Gres na zienalgaa gaca zigne nac zhiwseed zho, sac laa zho zienal guielrac ne no lo guidzliu rii. ²³Gacxe waa zeene rnee no lo zho Jesús men ne pquia lo cruz, men cose csilaa miech, rlëë zha Israel ron zhow; laa zha Gres, rzhidznie. ²⁴Sangue ne, ne nac ne zha ne bredzle Dios bzëëb xnëz me, zigtaa zha Israela, zigtagaa grëraa miecha, ndion ne ganle Jesús nac men ne biaadlu pa lotaa nac poder ne rap Dios, me biaadlu pa lotaa nac xquielrac Dios. ²⁵Mine rzac miech paat rquiind ga been Dios, ni nand zho ndziibguicraa nac min co lo grë xquielrac zho; zha ne rzacгаа cholze cho men nsis ga sca gut lo cruz, ni nand zho lëë men co mazdraa ndip lo grëse miech guidzliu.

²⁶Bets, bzian, golgan ganle lo grë to ne nac to zha ne ngab xnëz Dios, led grëde to nac zha rien nëz lo miech, led grëde to nac zha non, zha ne ziaadгаа lo grë dii ne nziuu lo zho. ²⁷Per ib laa Dios nobedz grë zha ne rzac miech peet rien, grë zha ne rzac zho nac zha nsis, parne gunctoladz me grë zha ne rzac zho nac zha rac, zha non. ²⁸Laa me nobedz grë zha ne sca rzac miech paat rquiin, zha ne rzac zho peet nond, parne guioog ro grë zha ne rzac zho nac zha non, zha nziuu. ²⁹Ga rlu me ganle ni tib choot grieelod gacniats lo me. ³⁰Golwi ganle, niapse por me laa ne nacie Jesús, grë guielrac, grë guielrien ne rdziaap ne, Jesús bneedza, ni Jesús nac men ne psilaa ne lo grëtaa xtol ne, men ne psanmbe ne laa ne bziaab xnëz Dios. Dios bnabey sca goca. ³¹Gacxe waa choot grieelod gacniats, zigne ziaadaque lo Xtiidz me zaatne rnee: “Zha ne racladz gacniats, mazd gunnon zho Dios por grëtaa ncuane run me.”

Xtiidz Jesús bnee Pabl

2 Gacxe waa tel naa, gołsoladz ganle bets, bzian, len dze ne bialseed naa to Xtiidz Dios, bned naa dien pe diidz nroob, dien pe diidz ndzielguic lo to. ² Bend naa dien peraa nseed naa to, sinque mine nac zhiwseed Jesús min co bialne naa, zeena gacnan to cho nac me ni pe nac ne pquia me lo cruz. ³ Lega gzhe gzhe rac naa, haxta rzhidz naa, rdzieeb naa no naa lo to. ⁴ Zeene laa naa psilo bne Xtiidz Dios lo to i, gon to ganle ib bned naa zigne rnee grē zha ne nac zha rac lo guidzliu rii; per blu Espíritu Sant ganle nacda beelze pe wseed, ni blu ganle pa lotaa poder ne rap Dios. ⁵ Sca bne naa lo to, sac laa naa racladz zha ne gbig sēeb xnēz Dios, me gnalo zho, gnalod zho grē mine nac xquielrac miech.

⁶ Parga nli no zaatne rnee no grē diidz nroob, diidz ndzielguic, per laa min co rnee no lo grē zha ne rienraa zha nac Xtiidz Dios, ni nacdgaaw zigne nac grē xtiidz ndzielguic grēraa miech, grē diidz ne rleynie grē zha rnabey ne no lo guidzliu rii; sac zigtāa zhaw, zigtagaa zhiwseed zhow, ncuaane tibrded naca. ⁷ Grē diidz ne rnee no, ndzielguic naca, sac zhiwseed Diosa, lēē xquielrac me ga. Ndzielguica, sac ga rlu me zha no guic me csilaa me miech gdzin zho lo guielndzon ne no me; gocnand miecha padzeela, per nolew zeene bzaa me guidzliu. ⁸ Grē miech ne no len dze rii, rioguidc zho zha nac xquielrac Dios; sac telne nioguidc zhow nabeyd zho nquia men ndzon ne nac Jesús ga lo cruz. ⁹ Zigne zhobneeque lo Xtiidz Dios, zaatne rnee:

Ncuaane waltaa gard guien miech,

nac grē mine quianiele Dios gdeed me lo grē zha ne nlipaa gbig lo me gleynie zho me.

Ncuaane choot gard gāna, ncuaane choot gard gona.

¹⁰ Sangue no laa no ndionlew, sac pxeel me zhiEspíritu me blu lo no zha naca, men co nan grēse mine no guic me.

¹¹ Zig nacse tib miech, grieelod gacnanpaa ne dien pe nac mine no guic zho, pe nacgaa mine rza zdoo zho, loxaque zhiEspírituse zho nana; scaque Dios, loxaque zhiEspíritu me nan grēse mine no guic me gun me. ¹² Ni tel no, Espíritu co nacnie no (nacnied no espíritu ne quianzē lo guidzliu rii), ni ible laa Dios pxeel me lo no zeena gacndion no zha nactaa grē ncuaane nole guic Dios gneedz me lo ne. ¹³ Zeene rzeet no grē guielnzaac co, laa no rneew zigne rneedz zhiEspíritu me guielbiini lo no, rneed now zigne riab guic grē zha rac ne no lo guidzliu rii. Laa no rnee grē min co zigne rlu zhiEspíritu mew, ni ible laaw nac par grē zha ne rioguicle zha racladz Espíritu co.

¹⁴ Grē zha ne nacnied zhiEspíritu Dios, cholze miech nac zho, grieelod tsoguic zho zha nac grē mine rlu Espíritu co lo no. Rzac zho ncuaane paat rquiind naca, sac grieelod guien zhow ne zhase. ¹⁵ Sangue zha ne rioguicle zha racladz Espíritu co, rien zho pe nac mine rlu me.

¹⁶ Ni nligaa zha guien zhow, zigne zhobneeque lo Xtiidz Dios, zaatne rnee: “Choot grieelod gacnan pe nac mine no guic Dios gun me, choot grieelod

glu lo me pe nac miñe no guñ me.” Per no, ndion now, sac grè ncuane nan Jesús, bneedz me diidz lo no ye no gocndiona.

Gnalod zho samiech zho

3 Bets, bzian, ne nligaa gard grieelo gne naa lo to zigne rne naa lo grè zha ne rioguicle zha nac miñe racladz zhiEspíritu Dios, sinque tibaque laa naa rne lo to zigne rne naa lo grèraa miech guidzliu, sac rrieequia bii mëdyeen nac to lo zhiwseed Jesús. ²Niapse ncuane ligase ziseed naa to, laa ne cseed naa to ncuane ndzielguic. Rrieequia nidzse nonedz naa quiaye to, laa ne gow to grè ncuane row zha gol.

Haxta niinagaa gard tsoguic to zha nac grè miñe ndzielguic, ³sacne laa to bii zienal miñe run miech guidzliu, laa ne guñ to miñe racladz Dios. Golguien ganle zha rac to, no to rlozhd glëëlsa to, rlozhd tillsa to. ÿLed squid gon no gac zha ne nole xnëz Dios! ⁴Pe i na rriee bla to rnee: “Tel no xnëz Pabl no no”, rrieequegaa zla zha ne rnee: “Tel no xnëz Apol no no.” Gase rlu ganle zienalde to miñe racladz Dios, sinque laa to zienal miñe no guic to.

⁵Nana, çcho nac Pabl, chogaa nac Apol parne no yquiaaqui tsodil to? Nli no biadseed to Xtiidz Dios, per tib ngundziin winse nac no lo me, bdziuun no miñe rnabey me no. ⁶Nac cuent rii zig nac tib guielgon, naa blo bni liu, laa Apol bgaala; per Dios nac men ne rnabey blana ni me pchooba. ⁷Golwi sca ganle, Diosse nac men non, sac me pchoob bni co, tel no peet ncuane nroob bdziuund no, lëë gdib tib bloo bni liu, stib bgaala. ⁸Zigtaa zha ne bloo bni liuw, zigtagaa zha ne bgaala, lal nac zho grop zho; ni Diosse nac men ne gdeed miñe rieguiäl zho tib tib zho por dziin ne been zho. ⁹Tib ngundziin winse nac no lo Dios grop no Apol; laa to nac zig tib lë liu ne quiayan Dios, zig tib yu ne quiazaagaa me.

¹⁰Pa lotaa wen Dios, sac bzooblo me naa naa psilo yu co, ni blu me lo naa zhapaa none tsaaw. Nli naa bgaa blee xcimienta, per niina zhaale zha ne nosoquiaw. Tib tib zha ne nosoquia yu co, none guien zho zaacse gzhixcuaa zhow, tsienal zho zigne nacse xcimienta ga, ¹¹sac gon nod pe nacne csëëb zho stib cimient, tibaque cimient no, lëë cimient co nac Jesús.

¹²ÿLaa cimient co nole! Nana no zho gzaa yu co niapse guiib or, niapse guiib plat, no zho gzaaw grè quie niazh, no zho gzaaw yag, nogaa zho gzaaw grè pe guizh, pe yag xiidgaa. ¹³Zeene gdzin dze ne laa Jesús gon guielwxtis, ga glu dien zha nac xtsiin zho; sac gal dze co grësew laaw none ted lo gui, ga glu dien pa min lëbraa. ¹⁴Zha ne pquiin ncuane rlëb lo gui, ib tedsod zгаа zho miñe rieguiäl zho gdeed Dios lo zho; ¹⁵laa zha ne pquiringaa grè ncuane znuse rec, mbe scase nitlo xtsiin zho. Peet ycaaniad zho, haxta zha pense tel zha laa zho lo gui co, zigne rzac zha ne rec lidz.

¹⁶Golgacnan ganle, xyadoo Dios gon nac to, sacne zdoo to rbëz zhiEspíritu me. ¹⁷Tel xyadoo Dios, tib yadoo mbe, tib yadoo nda naca; gacxe waa, zha ne gnitlow ib tedsod znitlo Dios zho. ¹⁸Golguien sca zaacse golgac, tel no zha ne rzac nroob rac zho wseed lo guidzliu rii, gnalod zho min co; nend

lel lo co no zho, ygaad zho mine nacpaa guielrac, guielrac ne rneedz Dios. ¹⁹Sac gon grè guielrac ne no lo guidzliu rii, ncuane beelze naca nèz lo Dios. Zigne raquietaque lo Xtiidz me zaatne rnee: “Grè zha rac ne no lo guidzliu rii, lèëque lo grè guielrac ne zienal zho, ga rlu Dios ganle paat rquiinda.” ²⁰No stib zaatne rnee: “Nanle Dios grè zhgab ne nonie guic grè zha rac, ncuane paat rquiinda.” ²¹Tsode to sca lozhd gacniats to dien cho xnèz miech guidzliu rii no to, golguien ganle grètaa ncuane no, laa Dios psana par yquiina lo to. ²²Zig nac guidzliu, guielmban, guielgut, ladznia to now, niicle ncuane no niinaw, ncuane naragaa ziaada, chen tow; haxta Pabl, Apol, Pedr, ib laa no zo nu par dziuun no xyudar to. ²³Grèse to tibaque xnèz men ne no to, lèë men co nac Jesús, men ne pxeel Dios.

Zha rzac zha ne rienee xtiidz Dios

4 Golguien sca tib moz winse nac no lo Jesús, laa me bzoo no noseed no miech xtiidz me mine gocnand miech padzeela. ²Ni zha ne gon znu run tib dziin, ible none nguzobdiidz gac zho lo men ne rnabey zho. ³Gacxe waa tel zha rzac to naa, tel zha rzacгаа grèraa miech naa, peet zienied guic naa. Haxta ni mine rzaac naa nac naa, peet nonda, rieguald guiep naa znutaa znutaa nac mine noyun naa. ⁴Nli peet dzeb nonied guic naa guiep naa nend cho pe glisqui lo naa, per led mincod gni naa ni tib dol rapdraa naa; loxaque Dios nan zha nac naa, me gneedz mine gaguaal naa.

⁵Gacxe waa, gunde to ne glole to guiab dien cho nac zha ne wenraa; sac min co gun men ne rnabey ne gal dze ne laa me guiaad. Gal dze co, me cxobnen ganle zhapaa nac ne tib tib ne, haxta grè mine rza guic ne, mine no zdoon, laaw glu me; grè no ne nodziuun no xtsiin me, dze co laa me gneedz mine riogualpaa no tib tib no.

⁶Bets, bzian, niina ne nozet naa no lo to nu grop no Apol, quiayunnond naa naa, niicle nosanwindgaa naa me. Ga sca ganle golwi, zeena cseed to gban to zigne nac Xtiidz Dios, tsode to lozhd dien cho non, chogaa nond. ⁷Stiba, ¿cho nadien nè lo to ne gunnon to to? Grè ncuane rap to, grè ncuane rac to, ¿niacxe led Diosd bneedza lo to? Dios name bneedza lo to, ¿pe nac dzigo no to rlozhd gacniats to zig nac zeene por xquielliger to bgaa tow? ⁸Niats rac to, masaque rzac to grèle zhiwseed Dios nan to, gaxle zo to lo me, haxta rzac to tole nac zha rnabey, paat rquiindraa no. Wenzhe tebaa nligaa zha rnabeyle nac to, zeena haxta ye no zley no.

⁹No hor rzaac naa, diunavez win psan Dios no ne nac no zha ne nonee xtiidz me, loxaque lo no rwi miech, rwi grè anjl dien zha rac no; zig run miech rieso zho lo zha ne rnabey zho ret. ¹⁰Ne znu quiadziuun no xtsiin Jesús, masaque zha yozh nac no lo miech, laa to gon xquizh me zha rien nac to lo zho. Zha nsis, zha zozhidzle rzoob zho no, laa to zha ndaan, zha ndip nac to. Masaque zha nziuu nac to lo zho, laa no rzac zho ni gand zho lo no.

¹¹Haxta lo nadze blactaa zaatne retgbin no, zaatne retnis no, per ni lidz no, per ni lar ne dziaacw no guiend, rdib rdzaag no rdziuun no dziin rdziniaa no

ncuaane rquiin no. ¹²Ni rlozh ga rreeque miech rsacsi zho no. Rreequia zha ne rdzibdee no, per rdziuund no gdzibdeeque no zho, sinque mazd rnab no lo Dios gunlay me zho; zha ne rtsidil no, rdziuuncasd no zho. ¹³Rreequia zha ne nē rnee lo no, per no, diidz wen rtsire no lo zho. Masaque rzac miech no, zig rzac zho grē ncuane paat rquiindraa, zig rzac zho grē ncuane nole lo guizh.

¹⁴Laa naa rzet grē min rii lo to, per nacda par gunctoladz naa to, sinque laa naa rzeta zeena guien to zaacse gac to, golguien ganle rleynie naa to, rzaac naa to zig tib xpëed naa. ¹⁵Niicle niaca mine ndal zha ne guiadseed to i, niicxe guiaad nzian mil zho waa, per led grëd zho tsoxcopaa to zig rioxco tib dad xpëed zho. Zigne rne naa ga, xpëed naa nac to, rreequia pxoz to nac naa, sac gon naa glo bialne xtiidz Dios lo to, laa to bzëeb xnëz Jesús.

¹⁶Goltsoxco sca, golban zigne mban naa. ¹⁷Ni ible mincopaa gon laa naa rxel Timoté ziaad lo to i, lëë stib xpëed naa i, ne nligaa rleynie naa me, tib zha nguzobdiidz nac me lo men ne rnabey me. Laa me ziaad i, me gzodiidz lo to ganle zigne rseed naa miech grëse zaatne ziyateed naa, scagaa noxco naa mban naaw.

¹⁸Rien naa no bla niats ne nac to i, rzac nlidraa guial naa lo to i stib.

¹⁹Gacnan zho ganle, gneedzse Dios diidz, ible laa naa none guialniob, dzigo bii zdzian ne dien pe nli na nacie zho xpoder Dios, te loxaque rnee zho ye.

²⁰Sac gon zha ne ngab xnëz Dios, grē mine rnee zho none glu nacie zho xpoder me, nacda loxaque diidzse. ²¹¿To nadien zha racladz to? ¿Pe rdziladz to guial naa guialgactox naa lo to i, te mazd wen ye niapse diidz ndooladz, diidz nex guialne naa lo to?

Zha ne runctal xtol

5 Zëeb diidz gon, lad to i no tib zha bgui ne quiayun tib dol nroob; per ni grëraa miech ne gard gliladz Xtiidz Dios rund min co. Bin naa lëëque xniaa pchoob zho quiangob zho. ²¡Yo na ne rzac to grële zhiwseed Dios nan to, gaxle zo to lo me! ¡Laa ne ctoladz to, laa ne tso to guielnë, cuee to zha qui lad to, lel no to rlozhd gacniats to!

³Niicle ne zozhaald naa lo to i, per zeene bin naaw tibaque nonie guic naa zha gaca. Nu laa naa gni lo to ganle zha riegual gac zha co: ⁴Grë to ne nac to zha ne ngab lo Jesús, rnab naa lo to ycaalsa to zigne rnabey me. Ndiönle ne ganle zeene laa to ycaalsa, ga zo Jesús lo to, scagaa naa, golgun cuent lo to i zo naa. ⁵Squi ndxie to grë to, golzonëz zha co, golcueegazh zho lo to i, tsie zho tsietsoe zho ladznia mendox, ga tednë xcuerp zho guien zho ganle pe noyun zho; nand new togo zzhixcuaa zho stib, zeena ycaania Jesús zho gal dze ne laa me gbiire guiaad.

⁶¡Xlëse gon squitaa racniats to rzac to zha mbe nac to, ni randze to zha ne quiayun dol dox qui! ¡Pe riende to telne glisquide to mine quiayun zho, ib tedsod zrieequiaraa zha ne squi gunctal xtol! ⁷Zha ne squi nac, masaque nac zho zig nac grë guielguidz dox ne znuse rded; golcueegazh zho sca, zeena ine mbe gac to nëz lo Dios, tete to guielguidz qui. Golguien ganle laa Jesús

psanmbele ne, mincopaa gut me, goc me gon nêz lo Dios zig carner yeen ne rgogon zho lo me lni Pascw. ⁸Golgotsaa gban ne zigne racladz Dios, grêse tel zha wban ne glo, grêse guielyozh, grêse guielntseeb ne bdziuuu ne, none csaan new grêsew. Ndzinli sca golgac, goltsienal mine nac diidzli; none mbe gac to nêz lo Dios, zig quietxtil ne notsd ncobi.

⁹Lo stib guits ne pxel naa lo to ga, laa naa psolè diidz lo to ganle ctsieelsade to grê miech yozh ne ndzinlid mban. ¹⁰Zeene sca pso naa diidz lo to, guiabde to togo naca parne ctsieelsadraa to grê zha ne gard gliladz Xtiidz Dios, zha ne rquiangob zha ne led tsieeld, grê zha ne zienal loxaque gunlo dimi, grê zha ne run guielgbaan, grêgaa zha ne rnalo grê mdio. Led zha coda, sac laga mban ne lo guidzliu rii, ible zanlsa ne grê ne zho. ¹¹Sinque zha ne bzet naa ga ctsieelsade to, nac zha ne nacle diidz xnêz Dios no zho, ni noque zho quiaiyunctal zho xtol zho, no zho rquiangob zha ne led tsieeld zho, no zho zienal loxaque gunlo dimi, zhiga zhiga laa ne gleynie zho Dios lel zhaa ncuaane rleynieraa zho, no zho rquiadiidzguizh samiech, no zho rzudz, nogaa zho run guielgbaan. Ne nligaa zha ne sca nac, per ni tib guielwagw gawniede to zho.

¹²Tel grêraa zha ne gard gliladz Xtiidz Diosa, led ned riogual glisqui mine quiaiyun zho, Dios nac men ne gunquizh zhow. ¹³Sangue zha ne nacgrê ne, zeene noyun zho tib ncuaane ndzinlid, ib rieguial glisqui new lo zho. Gacxe nana sca, zha ne squi quiaiyunctal xtol i, golcueegazh zho lad to, ni spalal gandzedraa to zho.

Zha none gac guielwxtis

6 Laa to gocnanle ganle, to rieguial glisqui tel pe nac ncuaane nonguield run zha ne nacgrê to. Lêda i gon run to, zeene pe tib dil rap to, lëëlêd zie to lo wxtis laa ne gbig to lo zha ne nacgrê to, zha csiooglo lo xtil to. ²¿Niacxe nande to zha ne ngab xnêz Dios, zha co cobey zha nac xtol grêraa miech zeene gal dze ne laa Dios gnabeya? ¿Pe nac dzigo grielod tose csiooglo lo tel pe dil win ne rap to? ³Haxta grê anjl name, ne gon cobey pe nac grê mine quiaiyun zho. Gacxe waa, grê dil ne rac lo guielmban rii, ne riogual cobey zha guiooglo low. ⁴Sca gon gun to, led node to, rnadse pew laa to ziele lo wxtis. ⁵¿Pe ni tib lë guielto guiend lo to? Lo grê to, ¿niacxe goon guiend zha ne grielo gnee lo to, cuêz lo xtil to? ⁶Nazdpaa rdziladz to dil, ¿pe i na lëêque zha ne nacgrê to quiadilnie to, ni rlozh ga zieque to zienie to xtil to lo zha ne rililadz Dios? ⁷Pe riende to tib guielto doxle i squi no to lëêque to quiadilla. Mazd golxecw tel cho pe run to.

⁸Mazdraa gon mbana squi no to rsacsi to miech, ni haxta zha ne nacgrê to rsacsi to. ⁹Nanle to ganle zha ne squi run guielntseeb, grielod gdzin zho zaatne rnabey Dios. Tsieniewguite guic to sca. Golsoladz ganle grêse zha ne run guielyozh:

zig nac zha ne rquiangob zha ne led tsieeld zho,
zig nac zha ne rquiangob zha ne nole tsieel,
zig nac zha ne nac mrazh,

zig nac zha ne rnalo grè mdio laa ne gnalo zho Dios,
 ni tib zho grielod gdziñ zaatne rnabey Dios. ¹⁰Scaque:
 zha ne nac ngbaan,
 zha ne zienie guic loxaque dieñ zha gunlo dimi,
 zha ne nac ngonziu,
 zha ne rzhixcuaa diidzguizh,
 zha ne rungiuet miech par cuan zho zho;

ni tib zho ygaad guieñzaac co. ¹¹Blalaa to bio lo grè dol co glo, sangue niina miech mbele nac to nöz lo Dios, laa Jesús ni Espíritu Sant psanle to zig tib zha ne peet xtold, laa me psanwenle to nöz lo Dios.

Gunctald zho xtoñ zho

¹²Nli ndal ncuaañe zac gun ne, gunctalda xtoñ ne, niicle choot rcadgaaw, per led grèda rquiin. Tel naa, niicle no ncuaañe zrieelo gun naa, per rund naaw; sac racladzd naa guien naaw, lozh ga lëew gnabey naa. ¹³Zëeb diidz rnee zho: “Laa guieñwagw biaan par gow miecha, scagaa zdoo zho laaw biaan par tsodzëw guieñwagw.” Nli scaw, per guiabd ne togo por min co lega gowcho ne. Pa rquiin ne lega tedso gow ne, sac gon zigttaa zdoo new, zigtagaa guieñwagwa, zdziñ dze ne gnitlo Diosa.

Guieñwagw ga na, sangue grè guieñyozh ne run miech rquiangob zho zha ne led tsielld zho, biaanñd ne par dziuun ne min co, sinque laa ne biaan par gban ne zigne rdziladz Dios, sac me rnabey ne. ¹⁴Tel new nitlod ne, sac gon zigne bleeban Dios Jesús con poder ne rap me, scaque zbeeban me ne zeene laa dze co gdziñ.

¹⁵Golgacnan ganle, rrieequia lëe tiblë xcuerp Jesús nu gon nac ne tib tib ne. Nana, ¿pe nonguiela ga dzigo gdziel tib lë xcuerp me ga xcuerp tib wnaa ro nöz? ¡Nonguiela gon! ¹⁶Sac gon zha ne raanie tib wnaa ro nöz, rrieequia tibaque rac zho ga grop zho wnaa co. Rnee lo Xtiidz Dios, par me: “Zeene laa mgui racgrop tib wnaa, tibaque miech rac zho ga grop zho.” ¹⁷Scagaa zha ne rzëeb xnöz Jesús, tibaque rac zho grop zho me, zhiEspíritu me racnie zho.

¹⁸Gacxe waa, gunde to guieñyozh yquiangob to zha ne led tsielde to. Lo grè dol ne no, min riise nac mine xcuerppaa miech rguitnie zho. Sac gon zha ne run guieñyozh co, masaque rsanbeed zho zho ga. ¹⁹Golguien ganle, zha ne nole xnöz Dios, masaque zha nac zig tib yadoo zaatne rböz Espíritu Sant, Espíritu ne rdeed Dios rbannie zho. Led nedraa rnabey xcuerp ne, ²⁰Diosle rnabeya, sac gon bzhiile me ne ni nroob goconon ne lo me. Gacxe waa, zigttaa xcuerp new, zigttaa xpensar new, gotsaa yquiin new par cxobnen ne ganle pa lotaa men nroob nac me.

Rtsire Pabl lo zhiwnabdiidz zho

7 Lo guits ne pxeel to lo naa, nzian ncuaañe rnabdiidz to, nu ganle laa naa ctsire lo wnabdiidz co: nli wena, telne niaca mine grielow ctsieelniad ne. ²Per parne tsod pe yquiaqui cho gun guieñyozh, tsonie zho zha ne led

tsieeld zho, mazd wena zigtaa mguiw, zigtaa wnaaw ctsieelnia zho, tib tib zho gbanniese zho tsiel zho zigne rieguiala.

³Zha ne ptsieelniale, zig nac mgui none gnee zho lo tsiel zho zeene racladz me, scaquegaa wnaa zeene racladz tsiel zho gnee lo zho none siguiel zho.

⁴Sac gon wnaa ne rtsieelnia, led zhadraa rnabey xcuerp zho, sinque tsiel-le zho rnabeya; scaquegaa mgui zeene laa zho rtsieelnia, tsiel-le zho rnabey xcuerp zho. ⁵Golguien sca, niicle mguiw niicle wnaaw nodne yca zho xcuerp zho lo tsiel zho. Laa telne rzacgaa zho none yquiind zho tsiel zho tib blalaa dze, sac rquiabladz zho gzodiidznie zho Dios, wena totsaque guiaan zhow diidz grop zho. Per zigne ted ga, gbiireque gnee zho lo tsiel zho, sac gon zha ne grielod cxcw, nend ccheep mendox zho gun zho guielyozh.

⁶Ne znu rne naa lo to, guiabde to nagon togo rne naa nopaa ctsieelnia to. ⁷Tel naa, rzac naa wena tebaa grëse to znu ctsieelniad, zigne nac naa; per na ncuane gacd ga, sacne zhaase zhaase nac ne tib tib ne. No zho pso Dios ctsieelnia, nogaa zho pso me ctsieelniad, per rley zho mban zho zigne nac zho. ⁸Zig nac grë zha ne bii tib, grëgaa zha ne gutle tsiel, wena tebaa grielo scase guiaan zho, ⁹per telne rien zho lëbd xcuerp zho, dzigo mazd ctsieelnia zho. Mazd wena ctsieelnia zho, lëdle so zho tib zho ni tel rec rdzu zho.

¹⁰Sangue zha ne ptsieelniale, laa naa rso diidz lo zho csaand zho tsiel zho, ni nacda xtidz naa, sinque ible sca rnabey Dios. ¹¹Laa tel zha ne guiaabgaa csaan zho tsiel zho, zaca, per lëëraasi grielodraa gbiire ctsieelnia zho, mazd mine naca telne zrielow ycatsieel zho stib, o guiaangaa zho tipse zho.

¹²Nu na ganle laa naa gnegaa chop lan xtidz naa lo zha ne led yed tsiel rliladz Xtiidz Dios; tib diidzse naca gni naaw, nacda mine rnabeyppaa Dios. Zha bgui ne mbannie tib wnaa ne rliladz Xtiidz Dios, per telne rio guic wnaa gbannie wnaa zho, nodne csaan zho wnaa. ¹³Scaquegaa wnaa ne mbannie tib mgui ne rliladz Xtiidz Dios, nod csaan zho mgui co telne riopaa guic mgui gbannie mgui zho. ¹⁴Zigtaa mguiw, zigtagaa wnaaw, zha ne sca mbannie tib zha ne rliladzle xtiidz Dios, ye zho runlay Dios ga, nenda haxta zio dze ne ye zho gliladz xtiidz me. Sac telne ctso zho, laa ne gbigraa xpëed zho lo Dios, lel znu sozit mëed.

¹⁵Nana, telne zhalgaa zha ne rliladz Xtiidz Dios ga, rnab csaanlsa zho, peet nacda maase ctso zho, nod pe nacne gzoobguicppaa tsiel zho lo zho cuëz zho. Sac gon zha ne rliladzle Xtiidz Dios, laa me bredz zho parne zaacse gban zho, bredzd me zho par tsodil zho; ¹⁶stiba, nand zho dien pe zdzin dze ne gliladz tsiel zho Xtiidz Dios.

¹⁷Mine naca tib tib to goltsoxco gun to mine rdziladz Dios. Zigtaa zha ne pso me ctsieelnia, zigtagaa zha ne pso me scase guiaan, sca none gac to; scagaa zha ne ncaatsieel-le zeene rliladz zho xtiidz me, none sca guiaan zho niicle telne rliladz tsiel zho xtiidz me. Grëse zha ne ngab lo me, diidz rii rso naa lo zho. ¹⁸Zig nac grë zha ne nole bey xcuerp zeene laa zho rzëeb xnëz me, sca no zho bey co gund zho ne yqueets zhow. Zha ne na nodgaa bey co zeene rzëeb zho xnëz me, scaque nod pe nacne tsopaa zho bey co.

¹⁹Mine mazdraa non lo me, gban zho zigne rdziladz me, guiend_{raa} ne dien cho no bey, chogaa noda.

²⁰Zigne rneque naa ga, grëse zha ne rzëëb xnëz Dios, tel zha nac zho zeene laa me bredz zho, scase none guiaan zho. ²¹Zig nac zha ne nac ngundziin lo be_n, peet tsienied guic zho guiab zho dien zha griee zho ladznia zha ne rnabey zho; per telne gdeeda diidz, zac tsoxco zho dien zha griee zho lo zha co. ²²Zha ne sca nac ngundziin lo be_n zeene bzëëb zho xnëz Dios, guien zho ganle rrieequia zonlaale zho, sac gon laa Jesús psilaale zho lo grëtaa dol ne bio zho. Zha ne nacd_{gaa} ngundziin lo be_n zeene bzëëb zho xnëz Dios, guien zho ganle tib ngundziinle nac zho lo Jesús niina, me rnabey zho.

²³Golguien ganle, grëse to laa Dios bzhiile to ni nroob gocnon to, gacxe waa mele rnabey to; ni togaa, lo me none gun to dziin, gdeete to diidz lega gnabey miech to. ²⁴Sca nasca gon bets gaca, tib tib to zigne nacse to zeene bzëëb to xnëz Dios scase no gban to, ine gleynie to me.

²⁵Stib wnabdiidz ne run to ga dien zha gac zha ne gard ctsieelnia, gneli naa lo to ganle, guien_d tib xley Dios mine gnabey_{paa} dien zha gac zho. Per golquiaadiag mine gne naa nu ganle zha rzaac naa, nanle to ganle, zha ne znu rquia zdoo Dios rbedz me, mine rquiin min co rnee zho. ²⁶Grë ne ne nac ne zha ne riladz Xtii_d Dios len dze rii, nligaa ngan nac lo xquielmban ne, gane zoot naa wena zha ne sca gard ctsieelnia, maase guiaantib zho. ²⁷Zha bgui ne na ptsieelniale_{gaa}, grieelod gni naa guiaantib zho; sca mbannie zho tsieel zho; per tel zha ne gard ctsieelnia_w, mazd sobd guic zho ctsieelnia zho. ²⁸Zha ne racladz_{paga}a ctsieelnia, zigtaa mguiw zigtaa wnaaw, led dol_d ga gun zho telne laa zho ctsieelnia; per gacna_n zho ganle, zeene laa zho pcatsieel-le, ib tedsod nroob guiel_{në} ne gan zho por grë mine noyac len dze rii.

²⁹Mine none guien to, zhisle nac dze ne so ne lo guidzliu rii, led nroob nac ngbidz ne grielo dziuun ne xtsiin Dios; gacxe waa, zha ne nole tsieel, mazd sac zho zho zig tib zha ne guien_d tsieel. ³⁰Zha ne quianie dimiw, zha ne no guielbleya, zha ne nogaa guiel_{nëw}, gdeete zho diidz yca grë ncuaa_n co lo zho par gun zho xtsiin me. ³¹Zha ne bienle run_{falte} grëtaa ncuaa_{ne} rquiin zho, gdeete zho diidz ctse grë ncuaa_n co lo zho, sac zigtaa guidzliuw, zigtaa grë ncuaa_{ne} no low, dzdin dze ne nitlow.

³²Mine racladz naa peet zhgab ctsed lo to. Golwi ganle, zha bgui ne tib, tibl_{ique} zienie guic zho run zho mine rdziladz Dios, mine nac xtsiin me. ³³Laa zha ne no tsieel, grieelod_{raa} sca gac zho, sac laa guic zho zienie zha gbannie zho tsieel zho, zha grielo gun zho mine rdziladz me, min co rionieraa guic zho. ³⁴Scaque grë men_w naa, zha ne tib, rioxcoraa zho run zho mine rdziladz Dios, dib nacse zho rbeeladz zho zho lo xtsiin me. Laa zha ne ptsieelniale, xco ne dien zha gbannie zho tsieel zho, dien zha grielo gun zho mine rdziladz tsieel zho, xco co rioraa zho.

³⁵Laa naa rne min rii lo to, per guiabde to togo rca naa ctsieelnia to, sinque laaw rne naa parne guien to zha gun to, zeena grielo zaacse gac to gun to mine rnabey Dios. ³⁶Zha ne quianie wnaa nguieg, telne rzac zho nonguiel_{da} ga

scase ted lo xquielnguieg xpëéd zho, sinque none ctsieelnia zho, peet nacda, led dold ga ctsieelnia zho. ³⁷Laa telne rzacгаа zho, wenraaw ctsieelniad xpëdwnaa zho, ible scale pquiabladz zho guiaan mëéd, wenaque ga telne sca rzac zho. ³⁸Wen ga gun zha ne sca gdeed diidz ctsieelnia xpëdwnaa, per mazdraa wen ga gun zha ne rzac mazd ctsieelniad xpëéd.

³⁹Nana, wnaa ne retгаа tseeel, nli zeene mban tseeel zho rnabey ley ne tseeelse zho gbannie zho; per zeene laa tseeel zho ret, zac ctsieelnia zho tel cho stib mgui ne racladz zho, totsaque zha ne noque xnëz Diosa. ⁴⁰Per tel naa, rzac naa mazdraa wen gban zho telne tsodraa guic zho ctsieelnia zho stib; sca nagon rzaac naa wena, ni led xtiidzde naaw sac rien naa led tibd naa, Espíritu Sant nacnie naa.

Bëel ne rgogon zho lo mdio

8 Stib wnableidz ne run to ga, dien zha nac guielwagw ne rgogon zho lo grë mdio, pe zrieelo gdioowa, te grieeloda ye. Zootle na grële to nan min co; per no hor zeene squi rzac ne grëlew nan ne, lel racniats ne, laa ne gacndooladz ne gnee ne lo grë zha ne nacgrë ne dien zha gun zho parne tsogucraa zho Xtiidz Dios. ²Zha ne rzac grëlew rac zho, ga rlu zho ganle peet riend zho. ³Tel Dios runbey me tib tib miech, nanpaa me cho nac zha ne rleynie me.

⁴Zhapaa dzigo gaca, ¿pe wena dioow ne xpëel grë ma ne rgogon zho lo mdio ga, te wenda ye? Ndionle ne ganle grë mdio ne riegan miech led Diosd ga, tibaque men ne nac Dios no. ⁵No zho rzac nziandox Dios, nziandox men rnabey no, no me no gbaa, nogaa me no lo guidzliu, ⁶sangue ne ndion ne ganle tibaque Dios no, lëe men co nac Pxoze ne, me psan grëtaa ncuaane no, me psan ne parne dziuunbey ne me. Ni scaqueгаа, tibaque men ne rnabey ne, lëe me ga nac Jesús, me bzaa grëtaa ncuaane no, me nac men ne rneedz xquielmban ne.

⁷No zha ne riladzle Xtiidz Dios, bii gardaque guien zho ne tibaque Dios no. Tibaque rzac zho mban mdio, gane zeene rquiin zho bëel ne rgogon zho lo mdio racchop guic zho, lëeque zha runctal xtol zho ga sca run zho. ⁸Golguien sca, tel Dios rwid me dien cho pe row. Guiabd ne togo por gow ne o gowdгаа ne bëel co laa ne guianzziuu lo me.

⁹Laa to nanle nasca, peet nacda yquiin to guielwagw co, per scagaa golcobey adel min co yquiaaqui gunctal to xtol tib zha ne squi bii racchop guic. ¹⁰Sac gon, nenda tibliladz to zob to zaatne riegan grë miech mdio noquiin to bëel co, ni gan tib zha ne bii racchop guica. Zeene gan zho to, nend yeque zho gbig gow zhow, per zeene lozh ga tibaque laa guic zho tsienie lëda ga been zho. ¹¹Zha ne sca gun, niicle ne nli rien zho peet nacd ncuaane noyun zho ga, per por zha laa zha co gunctal xtol. Gunscade to, golguien ganle ye zho ga psilaa Jesús zeene gut me lo cruz; ¹²gacxe waa, telne sca gun to por to yquiaaqui gun zho tib ncuaane rzac zho nonguield, lole Jesús ga quiayun to falt. ¹³Min co nagon, tel naa mazd maase gowd naa bëel co, telne por min

co yquiaaqui gunctal naa xtol tib zha ne nole xnëz Dios; sac lëda ga gun naa gac naa zig tib quie ne griel ni zho.

Mine rieguial zha ne run xtsiin Dios

9 Zigne nagon zac gun to grë ncuane wen ne racladz to, scaquegaa naa, zac gnab naa ncuane wen ne racladz naa. Tel naa gonlo naa Jesús men ne rnabey ne, Dioszhal bzo naa pxeel me naa none naa Xtiidz me. Ne squi ptsëe Dios lo xquielmban to zeene bialseed naa to, i rlu ganle me nacie naa.

²No zha ne rzac nlid Dios pxeel naa, sangue to nanwen to ganle me pxeel naa, sac gonlo to mine ben naa, mine blu naa; ni scagaa niina, lo xquielmban to i rlu ganle ne nli xtsiin me quiaayun naa. ³Grë zha ne sca rzac nlid Dios pxeel naa, rzac zho peet raguiald naa, gacnan zho ganle: ⁴¡Raguiäl naaw gon! Ni grëragaa zha ne rdziuungza no xtsiin Dios, rioguiäl no gneedz to ncuane yquiin no, gneedz to zaatne gbiaaz no. ⁵Tel naa, haxta raguiäl yquianie naa tib men wnaa ne gac tsieel naa, ine sënie naa me zigne run grëraa zha ne rdziuungza no dziin rii, zig nac Pedr, zig nacgaa grë zha bets men ne rnabey ne. ⁶¿Te loxaque grop no Bernabé naye znu zhaaque no dziuun no stib dziin, par gdziniaa no ncuane dioow no?

⁷Golgan ganle, zig nac zha ne rzëeb lo xtsiin menguiib, ¿niacxe zhaa lo dziin ne rdziniaa zho ncuane row zho rio zho lo xtsiin menguiib? ¿Zha ne rangaa, niacxe rieguiald zho yquiin zho ncuane rac zaatne ran zho? ¿Zha ne na rangaa ma, niacxe rieguiald zho yquiin zho ma zigne racladz zho?

⁸Guiabde to togo bod guicse naa riab mine rne naa nu, golgan ganle haxta lo ley ne psan Moisés ⁹no tib zaatne rnee: “Zeene guncun to xcon to dziin gzëeni ma mzion zhobxtil gacmbew, code to guiex ro ma, golsaan gow ma mine ygaa ro ma.” Golwi ganle zha rnee Dios, nana pe nan to ngonse rquia zdoo me. ¹⁰Lëda gon, grëse ne rquia zdoo me ne. Ga rlu me ganle, zha ne run xtsiin me, ible rieguial zho ycaa zho mine non xtsiin zho. Zig nacaque guielgon, zigtaa zha ne rana, zigtagaa zha ne runmbe grë guielnzaac co, ible rieguial zho yquiin zhow. ¹¹Tel no, rriequia nazho tib gon i bdziuun no biadseed no to Xtiidz Dios, ¿niacxe rioguiald no dzigo gneedz to ncuane yquiin no?

¹²Blalaa zha ne nale griin riaadted lo to i, rnabey zho to rdeed to ncuane rquiin zho, ¿pe lel no dzigo rioguiald gnaba lo to? Mazdraa gon rioguiäl no gnab now, per haxta lo nadze gard dziuun no min co, notaa nan zha rdziniaa no ncuane rdioow no; zeena guiaand zdoo to, lozh ga laa to csaan mine nac Xtiidz Dios. ¹³Led nanle to ganle, grë zha ne run dziin len xyadoo Dios, psan me diidz grë ncuane nac gon, ga xen zho pe yquiin zho, zig nac zha ne run dziin zaatne nac lo pcoog, lo ncuane rielogon miech ga, ga rdioob ncuane row zho. ¹⁴Ni scaquegaa psan Jesús diidz, zha ne cseed miech Xtiidz me, ib none lo dziin co gdziniaa zho pe yquiin zho. ¹⁵Per tel naa gon, wlalaa peet gard gnab naa lo miech.

Laa naa rzet min rii lo to, per guiabde to togo run naaw parne csilo to pe gneedz to lo naa. Ib zanaald naa min co, sac rley naa znu quiaayazhd naa

quiyayun naa xtsiin Jesús, mazd maase guetgbin naa, lëdle ctiche zho guielbley rii lo naa. ¹⁶Niicle ne znu quiayazhd naa quiyayun naa dziin rii, per ni lalnu racniatsd naa, sacne ible laa Dios bzo naa par gne naa Xtiidz me lo miech; ni, iprobsaxe naa telne gned naaw! ¹⁷Noyund naaw par dien pe premio yгаа naa, sac zig rne naa ga Dios bzo naa, me rnabey naa quiyayun naaw, masaque nacle naa zig tib ngundziin. ¹⁸Par naa, lëele premio nu nac guielbley rii ne znu liga quiaseed naa miech Xtiidz Dios, rnabd naa gneedzpaа zho ncuane yquii naa niicle ne raguiա naa gnab naaw.

Tsoxco zho yгаа zho premio

¹⁹Stiba mazdragaa wena, znu choot noneezd ncuane yquii naa, sac sca grielod cho gnabey naa; per niicle ne nagon choot rnabeyd naa, zhaal naa rac naa zig tib ngundziin lo grëse miech, parne gdeeda diidz tso guic zho sëëb zho xnëz Jesús. ²⁰Gacxe waa zeene no naa lo grë zha Israel, rac naa zigne rac zho, zeena tso guic zho gliladz zho cho nac Jesús. Zeene nogaa naa lo grë zha ne zianaլ xley zha Israel, niicle ne rnalodraа naa ley, per run naa grë ley ne zianaլ zho, zeena sca grielo yquiabladz zho sëëb zho xnëz Jesús. ²¹Scaquegaa zeene no naa lo grë zha ne runbeyd ley co, rioxco naa rac naa zig tib zha ne runbeyda; per guiabd ne togo haxta grë ncuane rleyniedraа Dios run naa. Laa naa run min co, zeena ye zho sëëb xnëz Jesús. ²²Grë zha ne pense quiayacnan zha nac Xtiidz Dios, zeene no naa lo zho, rund naa gne naa grë ncuane gard guien zho zha nac, rund naa csanwin naa zho, sac mine rioxco naa lozh gliladz zho cho nac Dios.

Tib tib miech, rguib naa rac naa zigne rac zho, parne grielo gzodiidz naa lo zho cho nac Jesús, zeena gacnan zho zha sëëb zho xnëz Dios. ²³Laa naa run min co, parne gdeeda diidz gnee naa Xtiidz Dios grëse lo miech, ni scagaa, gley naa gan naa ye zho yгаа lo guielndzon ne zhubnee lo Xtiidz Dios.

²⁴Nanle to ganle zha rzac zha ne rie tib lo corr, nzian zho nac zha ne rie per tibaque zha ne run gan, zha co rcaa tib premio. Golgun cuent nasca tib lo corr i no to, grëse to gołtsoxco xoon to zeena grëse to yгаа tib premio. ²⁵Grë zha ne sca rio tib lo wguıt, par grielo gun zho gan rioxco zho ran zho xcuerp zho, rund zho ncuane csiaab xfuerz zho. Nroob cuidad ne rap zho zho par gun zho gan tib coron guizh nguia ne znuse rgool. Scase nac premio ne rgaa zho, sangue ne gon, laa ne noxco yгаа ne tib premio ne gdziñd dze nitlo.

²⁶Gacxe waa, tel naa tibaque noxco naa dien zha xoonraа naa. Nanpaa naa pa gdziñ naa, nacd naa zig zha ne riend dien pa gdziñ, zha ne lega rquiaagaa puñet, rdeete zhow zaatne no yгаа. ²⁷Ni lalnu rdete naa diidz gac mine racladztaa xcuerp naa, tibaque rnabey naaw parne guiena ncuane nonguiel min co none guna, led gunda ncuane racladztaaw. Laa naa run min co zeena gun naa gan, sac gon, guielto dox ga grieequia naa znu no naa none naa lo miech zha gun zho, ni tel lozh ga naapaze biaan bend naa gan.

Nodne gleynie miech mdio

10 Bets, bzian, golsoladz ganle zha bzhaac grë pxozgol ne zha ne sca bzënie Moisés ga. Pxeel Dios tib xcow been ncal zaatne zieetaa zho, ni pteed me zho lo Nisdoo Nizhnie. ²Zigtaa lo xcow cow, zigtaa lo nisdoo cow, masaque rrieequia lo co brobnis zho, parne tibaque niac zho niacnie zho Moisés.

³Grëse zho gon milagr nroob ne been Dios, bnabey me bliaal quietxtil zhan gbaa bdeed me dow zho, ⁴beencta me nis tib cho quie bdeed me go zho no zho dan bidz co. Lëële Jesús ga bdeed nis co go zho. Lo zho ga zo me, rrieequia me ga nac quie ne bda nis go zho, sac mese rzhixcuua lo grëtaa xliaadz miech. ⁵Niicle scataa gon Dios zho, per led grëd zho bioxco nion xtiidz me, nacne ndal zho bnitlo bioliuse zho dan co. ⁶Gase na ganle gotsaa gwi ne zha bzhaac zho, zeëna zzoobladzd ne dziuun ne grë ncuuaane ndzinlid ne been zho. ⁷Golguien gleyniede to mdio, zigne been zho. Rnee lo Xtiidz Dios: “Blozhse dow zho, go zho, laa zho psilo biee lo zhimdio zho.”

⁸Gotsaa gwi ne ganle, pe guieinë ne bgaa zho zeëne brieequia bla zho lega bionie wnaa, tib dzeque bnabey Dios gut galptson mil zho. iNi lalnu tsod guic to gun to min co! ⁹Ib gunglëëde to Dios, sac zha, zeëne benngulëë zho me, bnabey me brieequia grë meel pquiaa maw zho, ndal zho gut. ¹⁰Niicle glisquidгаа to tel pe nac mine quiayun me, sac tel zha, sca been palal zho; nacne pxeelaque me anjl ne rnitlo, ndal zho bnitlo anjl co. ¹¹Sca nagon bzhaac grë pxoz gol ne ga, gotsaa guien ne sca dziuund ne mine been zho, mine been zho ga laaw zhobnee lo Xtiidz Dios parne gacndion new, guien ne zaacse gban ne, ne nac ne miech ne mban len dze rii ne znu ziaadyoble nitlo guidzliu.

¹²Gacxe waa, zha ne rzac mbanpaa zho zigne racladz Dios, none nsin so zho zeëna gund zho ncuuaane guntal xtol zho. ¹³Nli no ncuuaane rcheep ne guntal ne xtol ne, per nacda ncuuaane griin rien. Pe zhidaa miech ne zieded lo min co. Tsod mine guiab ne ib lëbd ne griee ne lo. Mine naca none gnalo ne Dios, sac tel me ib csaand me guiab ne tib lo ncuuaane glëbd ne griee ne; sca nac xtiidz me, ni mesi gon ctsëed me mine rnee me. Me nac men ne gacnien ne griee lo griee ne low.

¹⁴Bets, bzian, golguien sca ib none csaan to grë mdio, gnalodraa tow. ¹⁵Miech nixbiini nac to, grë mine rne naa lo to nu, nan to ganle ncuuaane rquiina. ¹⁶Golwi ganle, zeëne rdioow ne quietxtil, rdio ne vin, rdziuun ne xtsee ne been Jesús ga, ga rlu tipse nac ne grë ne nacie ne me. ¹⁷Niicle ne ndal nac ne, per ne tibaque quietxtil ne rdioow ne, min co gane tibaque cuerp nac ne grë ne, ni lëë xcuerp Jesús ga. ¹⁸Scaque zha Israel, zeëne row zho xpëel ma ne riogon lo Dios, ga rlu zho ne nacie zho me.

¹⁹Zha ne rnalogaa mdio, zeëne row zho grë ncuuaane riogon lo mdio, scaque tibaque rac zho grë zho mdio. Per guiabde to togo mban mdio, togo mazdragaa nac bëel ne rgogon zho lo mdio. ²⁰Mine racladz naa guien to, zeëne sca run grë miech pe rgogon zho lo grë mdio, lo mendox ga rgogon zhow, led lo Diosda. Golguien sca, ib tsiesëebde to lo grë zha ne quiyownie mdio, zeëna

gacniede to mendox. ²¹Lëdraaw ga gon gun to, tel rlozhse rquiin to xtsee ne psan Jesús diidz ga dziuun ne, ni tsieque to tsieguie to, tsietow to zaatne rownie zho mendox. ²²¡Gunscaade to, gunglëede to Dios! ¡Golguien ganle, lëbd ne dzian ne xquielblëe me!

Zha gun zha ne riladzle Jesús

²³Zig rne naa ga: “Nli zac gun ne ncuane gacladztaa ne, per led grëda nonguie!” Tel naa, zrieelo gun naa ncuane gacladztaa naa, per led grëda yquiin par gun naa xyudar grëraa zha bets ne, lozh tsoguic zho Xtiidz Dios; ²⁴sac gon, ib none dzioxco ne grëraa zha ne nacgrë ne. ²⁵Zig nac grë bëel ne rdo lo lgui, zac gow tow, ib gunde to gnabdiidz to dien zha naca, sac gon nend bëel ne biogon lo mdiow, dzigo laa dzeb co tsonie guic to. ²⁶Golguien ganle, Dios psan guidzliu, scagaa grëtaa ncuane no low, chen me naca.

²⁷Zeene tel zha tsiegaa to tib wagw lidz tib zha ne gard gliladz Jesús, bëel ne gneedztaa zho golgowa, per scaque gnabdiidzde to dien zha naca; zeena peet dzeb tsonied zdo to. ²⁸Per telne griequia tib zha ne gnë bëel ne biogon lo mdiow, gowde tow; zeena csande to zdo zho. ²⁹Niicle ne ndionpaa ne led dold ga gun to gow tow, per zha ne gana ga sadol zdo zho.

Nana gnë to: “¿Pe nac dzigo por stib zho grieelod gun naa mine racladz naa? ³⁰Tel rded naa xquizh lo Dios zeene pe tib guielwagw ne rquiin naa, ¿pe nac dzigo por mine rzacse stib zho, grieelod gow naaw?” ³¹Golguien ganle, racda por zha cose; sac grëse ncuane dziuun ne, haxta ncuane dioow new, ncuane dio new, none zeene nodziuun new cxobnen ne ganle pa lotaa men nroob nac Dios.

³²Gotsaa guien ne sca ganle, dziuund ne ncuane yquiaaqui csan ne zdo stib miech, zigtaa zha Israela, zha stib guiedza, zha ne nolegaa xnëz Diosa. ³³Tel naa, zanaid naa ncuane gdziladz naa naase, sinque rioxco naa grëtaa ncuane run naa, run naaw par gacnie naa grëse miech, zeena grieelo tso guic zho gnab zho lo Dios csilaa me zho lo xtol zho.

11 Golwi sca, zigne ran to noxco naa mban naa zigne blu Jesús, scaquegaa to goltsoxco gban to zigne ran to mban naa.

²Bets, bzian, rleyne naa to gon sac tibaque rsoladz to naa, ni rioxco to zienal to grë mine pseed naa to. ³Per golsoladz ganle, grëse men wnaa, none zha bgui gnabey lo zho, tel zha bgui Jesús rnabey lo zho, zigne rnabey Dios lo me. ⁴Gacxe waa, tel tib zha bgui yase nozodiidznie zho Dios, quiateedgaa zho xtiidz me, ni zob xombrel zho; xquielto Jesús ga rbee zho. ⁵Scagaa men wnaa, tel zhoobd bay guic zho ni zo zho nozodiidznie zho Dios, quiateedgaa zho xtiidz me, xquielto mgui ga rbee zho; sac ga rlu zho rond zho mine rnabey mgui. ⁶Telne racladzdga zho gdze lad guic zho, mazd gnabey zho chug guitsguic zho. Laa telne rtoladz zho chuga, rtoladz zho gacruxa, dzigo mazd cxobguic zho xpay zho.

⁷Grë zha bgui, nod pe nacne gdze lad guic zho, sac choot samiech guidzliu zho rnabeyd lo zho. Zeene bzaa Dios mgui, bzaa me zho zigne nac me, zeena

glu zho ganle pa lotaa meñ non nac me; scagaa wnaa, laa wnaa biaan par glu zho ganle non mgui. ⁸Gotsaa gwi ne ganle, letxe xcuxtid wnaa waa biao mgui, sinque xcuxti mgui briece biao wnaa. ⁹Stiba, zeene psan Dios wnaa, ib laa me psan zho par gacnie zho mgui. ¹⁰Gacxe nagon waa ib none gdze lad guic wnaa, zeena glu ganle nguzobdiidz zho lo zha ne rnabey zho; haxta grè anjil ne no gbaa zley zho gan zho min co.

¹¹Per guiabde to togo peet nond wnaa, golsoladz ganle, psanle Dios diidz zigtaa mguiw, zigtaa wnaaw rquiinsa zho; sac telne guiend wnaa guiend mgui, telne guiendgaa mgui guiend wnaa. ¹²Gotsaa gwi ne ganle, zeene biao wnaa, cho mgui briece dzit ne biao wnaa, per zeene laa wnaa biaan, haxta lo nadze wnaale rzo mgui; zigtaa mguiw, zigtaa wnaaw Dios psan zho grop zho.

¹³¿To nadien zha rzac to? ¿Pe nli nonguiela gdze lad guic wnaa zeene nonab zho lo Dios, te nonguielda ye? ¹⁴Golwi ganle ib no gdze guic wnaa, biaanle zho rroob guits guic zho parne ctsew lad guic zho; ¹⁵tel zha, haxta rleynie zhow zeene scataa noola, sangue ne nac ne zha bgui, guieltow ga guiool guitsguic ne. ¹⁶Tel nogaa zha ne rzac led scada, maase gnee zho. Per ible znu gon noseed no miech, ni grèragaa zha ne riladzle Xtiidz Dios, rien zho ne nli scaw.

Zha none gac xtsee ne psan Jesús

¹⁷Bets, bzian, ne nligaa rley naa tibaque rsoladz to naa, per bin naa zeene rcaalsa to row to xtsee ne psan Jesús diidz, laa ne gley to ycaalsa to, lel quaiyunctal to xtol to. Mincoosi nagon ni lalnu riod zdoo naaw. ¹⁸Ziyon naa gzobtaa zeene rcaalsa to, pe na tsiegald tilidiidz to, laa ne tipse gac to lel rleëlsa to. Ni rgobey naa nli scaw. ¹⁹Rien naa masaque rzac to ible sca none gac to, parne glupaa cho nac zha ne non xtiidz, zeena guianzuiu zho lo miech.

²⁰Led zhixtseedraa Jesús i gon run to. ²¹Sac ron naa zeene laa to row, masaque lëëlëd rac to row to ncuaane zienie to, ib rwide to no zha ne rdzin ga quianied zho nroob ncuaane gow zho. Squi rzob to rowcho to, haxta rzudz to; laa zha mbanse rac zho grielod gow zho ncuaane row to. ²²¿Mod guiend lidz to, ga sob to gow to, guie to haxta zaatne guieltaa to, led node to runctoladz to zha ne squi guiend pe yquini? I gon rlu to rleyniede to grè zha ne no xnèz Dios. ¡Ni palal gon rdziguiend naa ncuaane noyun to i!

²³Golsoladz ganle zha nac ne laa xtsee rii biaan, Jesús psan diidz gaca, sca gocnan naaw ni scagaa biallu naaw lo to. Wdze ne bnaaz zho Jesús ga, zeene blozh dowxtseenie me xpëëdsuel me, bzhen me tib quietxtil, bdeed me xquizh lo Dios; ²⁴blozhse bdeed me xquizh, nzian lë been me quietxtil co, bdeed mew lo zho rëb me: “Golquina, rriequia lëë xcuerp naa nu, sac gon znu gun zho xcuerp naa parne csilaa naa to grè to. Golgun xtsee rii, parne glu to ganle tibaque rsoladz to naa.”

²⁵Blozh ga, scaque bzhen me tib cop no vin, rëb me lo zho: “Lëë stib trat cub nu gon riaan Dios grè me miech, rriequia xchen naa nu nac vin rii, ren ne tso sell trat co par glu nona. Gzataa zeene znu guie to vin, golsoladz ganle zha naca.”

²⁶ Golguien sca, zeene guntaa to xtsee co zaacse golguna, sac gon, ga quiaxobnen to lo miech Jesús nac men ne gut xcuent to, psilaa me to. Tibaque none gun to xtsee co, haxta gdziñ dze ne laa me guiaad stib.

²⁷ Gacxe waa, zha ne rienewguit guic rquiind zho xtsee co zigne no yquiin zhow, dol nroob ga run zho, xcuerp Jesús ga, xchen me ga noguitnie zho.

²⁸ Zeene gun to xtsee co, none wen wen sob to ganle zha naca, pe nacne laaw rac, dzigo lozh ga zac yquiin tow. ²⁹ Sac gon zha ne lega gow guietxtil co, lega guie zho vin co, sac zhow zig beelze pe xtsee; rriequia guieñe ne yгаа zho ga gow zho, guieñe co ga guie zho. ³⁰ Mincocxe waa, blactaa zha ne nacgrë to i quiyaan nsis, nogaa zho rzacñe, haxta nzian zho gutle.

³¹ Telne niaca mine wen wen gwi ne ganle zha nac xtsee co, tsod pe nacne pe guieñe ne cxeel Dios dzian ne. ³² Ni zeene scagaa rteed me ne tib caxtigw, laaw run me parne tsa ne biini gbiire gbig ne lo me, zeena led yed ne nitlo gal dze ne nitlo grëraa miech ne zienal ncuane lo guidzliu rii. ³³ Bets, bzian, golguien sca zeene ycaalsa to gun to xtsee co, golcuëz grëraa zha ne nacgrë to, dzigo tipse golsilo golquiina. ³⁴ Tel zha ne riengaa lëbd zho lozh gdziñ grëraa zha ne nacgrë zho, mazd gowgazh zho lidz zho, zeena yguibd zho yгаа zho guieñe co.

No spalal mine racladz naa gacnan to, per naa zeene guiañ naa nëz qui dzigo gne naaw lo to.

Guielbiini ne rdeed Espíritu Sant

12 Bets, bzian, nugaa na ganle laa naa gzet zha nac guielbiini ne rneedz Espíritu Sant, sac racladz naa wen wen guien to zha naca. ² Rsoladz to ganle zeene gard gliladz to Xtiidz Dios, nëzrii nëzrec bio to güeygan to stib stib grë mdio, ncuane ni tib lan diidz rneed; sangue Dios ne rililadz to niina, led scad nac me. ³ Per nsin golso dien cho nac zha ne noteedpaa xtiidz me, sac nzian zha ne rnee xtiidz Espíritu Sant noteed zho lo miech, per tel rzo zho rdzibdee zho Jesús, ga rlu rquidie zho. Sac zha ne nli nacie Espíritu Sant, rdzibdeed zho Jesús, sinque rlu zho ne me rnabey zho, ni haxta dib zdo zho rnee zhow.

⁴ Tib tib zha ne rililadz Jesús, zhaase zhaase nac guielbiini ne rгаа zho, per tibaque men ne rdeeda, lëe men co nac Espíritu Sant. ⁵ Nzian mod zrieelo dziuun ne dziin lo Jesús, per grëse ne me rnabey ne. ⁶ Tib tib ne zhaase zhaase mod ne rlu Dios nacie me ne, per grëse ne me nac men ne rlu zha dziuun ne xtsiin me.

⁷ Guielbiini ne rneedz Espíritu Sant lo ne tib tib ne, laaw rneedz me parne dziuunlsa ne xyudar grë zha ne nacgrë ne gacndionraa ne zha racladz Dios.

⁸ No lo zho rdeed me guielbiini rien zho zha cso zho diidz lo miech, no lo zho rdeed me guielbiini rseed zho grë ncuane ngan ni rlu zhow lo miech,

⁹ no lo zho rdeed me guielbiini dib zdo zho rnalo zho Dios, niicle ncuane mazdraa ngan rnab zho lo me, raca;

no lo zho rdeed me guielbiini zeene r nab zho lo Dios, riac grè men
rzacnè;

¹⁰ no lo zho rdeed me guielbiini r nab zho lo Dios rac grè milagr,
no lo zho rdeed me guielbiini rteed zho xtiidz Dios lo miech,
no lo zho rdeed me guielbiini rien zho cho nac zha ne nlijaa nacie me,
cho zhagaa nacie mendox;

no lo zho rdeed me guielbiini rnee zho stib diidz ne gard cseed zho,
no lo zho rdeed me guielbiini rien zho pe rnee zha ne rnee diidz co,
dzigo rnee zhow.

¹¹ Grèse guielbiini, Espíritu Sant rdeeda, ni me nan pa mine rneedz me lo
ne tib tib ne. ¹² Lo grèse ne ne nac ne zha ne no xnèz Jesús, rriequia xcuerp
me nac ne. Tel cuerp, niicle ne nzian part niaaw, per tibaque naca. ¹³ Ndal
miech ne nac xcuerp me, no zho nac zha Israel, no zho nac zha zit, lo grè zho
no zho ngadoo lo ben, nogaa zho zonlaa, per grèse ne tibaque Espíritu ne
nacie ne, sac tibaque Espíritu bgaa ne zeene brobnis ne.

¹⁴ Gotsaa gwi ne ganle, no ni ne, no nia ne, no diag ne, nzian lè niaa xcuerp
ne, per tibaque naca. ¹⁵ Gacxe waa telne niaca mine rnee ni ne, grieelod guiaba
porne nacda nia ne, nacda xcuerp ne. ¹⁶ Scaque diag ne, grieelod guiaba porne
nacda bziaalo ne led yedraaw nac xcuerp ne. ¹⁷ Sac telne niaca mine gdiipse
xcuerp ne niaa bziaalo ne, ¿zha nadien gon ne? Telne gdiipsejaa xcuerp ne
niaa diag ne, ¿zha gzoobzhi ne? ¹⁸ Lèèzhe wen led scad psan Dios xcuerp ne,
sinque grèse part ne niaaw bzaa mew zigne gocladz me, psanse mew zaatne
rquiina tib tiba. ¹⁹ Sac telne tipse niaa grèse part ne nac xcuerp ne, ¿zhazhe
rlu ncuaan co! ²⁰ Gocda sca, sinque zhaase zhaase nac tib tib part co, per
grèsew tibaque cuerp naca. ²¹ Gacxe waa grieelod guiab bziaalo ne lo nia ne:
“Ib rquiind naa luu”; guiaabgaa guic ne lo ni ne: “Ni lalnu rquiind naa to.”
²² Grèse part ne niaa xcuerp ne nose zaatne rquiina, haxta mine mazdraa nda
lèè min co rquiinraa.

²³ Stiba, no part ne niaa xcuerp ne rzac ne zhi nona, no part haxta rtoladznie
ne, per gotsaa gwi ne ganle part co nac zaatne ranraa ne, rioxcoraa ne rdze;
²⁴ sangue part ne nziuu lo ne, zienied guic ne dien zha gdzew. Ible sca psan
Dios xcuerp ne, zeena sca gacnon part ne rzac ne zhi non. ²⁵ Sca niaa xcuerp ne,
grèse part ne niaaw rquiinlsaw xcompañera; led yeda rtsolsa. ²⁶ Golwi ganle,
zeene nè tib part xcuerp ne, grèse part ne niaaraaw zienie nè co; scaquejaa
zeene rdioon tib part co, grèsew zienie guielbley co.

²⁷ Laa naa rne min rii lo to, sac racladz naa guien to sca none tipse gac to.
Golguien ganle xcuerp Jesús i nac to grè to, tib tib part ne niaa cuerp co i
nac to, rquiinlsa to zha ne nacgrè to. ²⁸ Ni zigne sca tib tib part ne niaa cuerp
nose zaatne rquiina, scaquejaa grèse zha ne no xnèz me, bzose Dios zho pe
nac dziin ne gun zho:

no zho rienee xtiidz me lo miech,
no zho rteed xtiidz me lo miech,
no zho rseed miech xtiidz me,

no zho rnab lo me rac grë milagr nroob,
 no zho rnab lo me riac men̄ rzacnë,
 no zho rioxco run̄ xyudar grë miech,
 no zho rzo rac zho zha rnabey,
 nogaa zho rnee grë diidz ne gard cseed zho.

²⁹ Golgan̄ ganle, psod me zho grëse zho tsienee xtiidz me lo miech, grëse zho cteed xtiidz me, grëse zho cseed miech xtiidz me, grësegaa zho gnab gac milagr. ³⁰ Niicle psodgaa me zho grëse zho gnab guiac men̄ rzacnë, grëse zho gnee stib diidz, grësegaa zho gnee zha nac grë diidz co. ³¹ Zhaase zhaase nac guielbiini ne rgaa tib tib zha ne no xnëz me, per goltsoxco ygaa to guielbiini ne mazdraa rquiin.

Sca nagon̄ naca, per golquiaadiaga ganle, nu laa naa gzet lo to stib mine mazdraa non lo grë guielbiini rii.

Guie|wleynie

13 Mine mazdraa rquiin gon̄ nac ne gleynie ne samiech ne. Tel̄ niaca mine bgaa naa guielbiini rne naa grë lose diidz ne rnee miech, haxta grë diidz ne rnee xanj| Dios rne naa, ni tel̄ rleynied naa samiech naa, ¿pa dien̄ rquiin rac naa grëtaa diidz co? Rrieequia nac naa ga zig tib lë guiib ne loxaque rzedz.

² Tel̄ niaca mine rteed naa xtiidz Dios lo miech, rien̄ naa pe nac mine naraa cxobnen̄ me, grëse wseed ne no rien̄ naa, ni rleynied naa samiech naa, jpaat rquiinda! Tel̄ dib zdoogaa naa rnalo naa Dios, haxta ncuaa|ne mazdraa ngan̄ rnab naa run̄ mew, ni rleynied naa samiech naa, jpeet nonda!

³ Tel̄ quizgaa naa grë ncuaa|ne quianie naa lo grë zha ne guien̄d pe yquiin, haxta gded naa naa tsec naa, per tel̄ rleynied naa samiech naa, jzhlëse ga gun̄ naa min̄ co!

⁴ Sac gon̄ zha ne nli mban zigne nac guie|wleynie co:

riednied zho samiech zho,
 wen rac zho lo samiech zho,
 racnëd zdoos zho, niicle ran̄ zho wenraa noded stib miech lo zho,
 rund̄ zho ne lëëque zha gun̄non zho,
 racniatsd zho lo samiech zho,

⁵ rund̄ zho ncuaa|ne coguelnë zho, gun̄glëegaa zho samiech zho,
 zienald̄ zho ne tebaa lose zho yquiin grë pe cos,
 nacd zho zha ne lega zolëë,
 rapguielnëd zho samiech zho,

⁶ ni lalnu riod zdoos zho mine run̄ zha ne rsacsi samiech,
 mine rleynie zho nac diidzli.

⁷ Zha ne nli rleynie samiech, ni lalnu peet grielod yca gleynie zho zho; rquiaadiag zho mine rnee zha co, rzhidznied zho zho; tibaque rquiabladz zho wen greequia zho, rsaand zho zho, tibaque racnie zho zho.

⁸Zdziņ dze yquiindraa cho cteed xtiidz Dios lo miech, yquiindraa gnee zho stib diidz, yquiindraa grē guielrac, sangue guielwleynie gdziņd dze ne nitlow. ⁹Niicle ne nogaa ne guielbiini ne rneedz Espiritu Sant, niicle no zha ne rien zha gnee zho Xtiidz Dios lo miech, per palalse nac ncuaaņe rien ne niina. ¹⁰Sangue gaļ dze ne laa Dios lozh gzhixcuaa ne zigne no gac ne, grēse guielbiini ne rdziaap ne niina, paat yquiindraaw.

¹¹Masaque nac ne niina zig tib mēēdlas. Teļ naa, zeņe goc naa mēēdlas, grēse ncuaaņe bne naa, grēse ncuaaņe bien naa, grēse ncuaaņe pseed naa, grēse ncuaaņ co beņ naaw zigne ruņ grēraa mēēdlas. Per zeņe laa naa broob, laa naa bīaa biini, grēse ncuaaņ co laa naa bienpaa zha naca; laa guielmēēdlas co bded. ¹²Scadaa nagon rziac ne niina, palalse rien ne zha nac Dios, rriequia rdzianse ne me niina zigne raņ ne zhimlē ne lo beelze pe tib lē vidr; per zdziņ dze laa ne dzianlo me zigne nacpaa me. Palalse ndion ne niina zha nac me, palalse rsilo rdzian ne me, per gaļ dze co laa ne dziuņbepaa me zigne runbey me ne niina, nanpaa me zha nac zdoo ne tib tib ne.

¹³Golgacnaņ sca ganle, grē guielbiini co zdziņ dze ne yquiindraaw, sangue ne znu: dib zdoo ne rnalo ne Dios, noniepaa guic ne zac miņe rnee me, ni rleyne ne samiech ne, lozhda. Per lo gza tsona nagon, guielwleynie co nac miņe gdziņd dze ne gdzēē.

Zha ne rnee stib diidz

14 Laa to nanle pa miņ nac miņe mazdraa non, įgolleyne samiech to sca! Per scagaa goļnab ygaa to guielbiini ne rneedz Espiritu Sant. Zig nac guielbiini ne rgaa zha ne rteed xtiidz Dios lo miech, goļnab ygaa to miņ co zeņa sca grieelo cseed to miech xtiidz me.

²Sac teļ zha ne rgaa guielbiini rnee zho stib diidz, zeņe rnee zho diidz co choot rienđ dien pew, sac lo Dios ga rnee zho. Teļ pe nac miņe rnee zho ga, Espiritu Sant rsiaaba guic zho, per choot racnaņđ dien zha naca. ³Sangue zha ne rgaa guielbiini rteed zho xtiidz Dios lo miech, miņe rnee zho ga rquiina par tsogicraa miech zha racladz me, par guien zho pe nonguiel guņ zho, ni rchoobladza zdoo zho.

⁴Tib zha ne sca rnee stib diidz, lose zho rquiin guielbiini co, sac zhase riogicraa zha racladz Dios; sangue zha ne rteed xtiidz me, diidz ne rnee zho rquiina lo grēraa zha ne no xnēz me, grēse zho riogicraa zha racladz me. ⁵Wena tebaa grēse to ygaa guielbiini co gnee to stib diidz, per mazdraa gon wena cteed to xtiidz Dios lo miech, cseed to miech xtiidz me; sac miņ co mazdraa rquiin, lēdle gnee to stib diidz. Zacaquegaa gnee to stib diidz co, totsaque lozhse gnee tow, gneegazhaque to dien zha naca; zeņa sca yquiina lo grēraa zha ne no xnēz Dios.

⁶Bets, bzian, to gase nadien, teļ niaca miņe glanso naa lo to i csilo naa gne naa stib diidz, įpa dien yquiina lo to? Per teļ glanso naa, iņe csilo naa clar gne naa lo to pe nac miņe zinee Dios lo naa, pe nac grē miņe rien naa, pe nac

mine ziaadyob gac, zha nac grë mine zhobnee lo Xtiidz Dios, led grëse min co zien to zha naca, ni squiina lo to grëse to.

⁷Haxta grë ncuuane rool miech, zig nac bzie zig nacgaa vihuel, tel csilo zha ne noyoola tel zhataa gool zhow, ¿zha dien guien miech pa di noyool zho? ⁸Zig nacgaa zha ne rcuedz cornet lo menguiib, telne tel zhataa ycuedz zhow, ¿zha dien gacnan menguiib pe nac vis ne quiaayun zho? ⁹Scadaa nagon run to zeene rnee to stib diidz lo miech, ¿zha nadien guien zho pe nonee to? Rriequia lo mese ga rnee to. ¹⁰Zig nac lo guidzliu ndal lo diidz rnee miech, per tib tiba nose mod ne rnee zhow, nose zha ne riena. ¹¹Telne guiaad tib zho lo naa csilo zho gnee zho, ni rien d naa pe quianee zho, grielod guien naa pe racladz zho, guiengaa zho zha rzaac naa.

¹²Nana sca, zha ne rquiabladz ygaa guielbiini ne rneedz Espiritu Sant, gnab zho ygaa zho mine grielo yquini lo grëraa zha ne nacgrë zho, zeena grë zho tsoguc zha racladz Dios gban zho. ¹³Gacxe nagon waa, zha ne rneele stib diidz, none gnab zho gdeed Espiritu Sant guielbiini lo zho guien zho pe nac grë diidz co, parne gnee zhow lo miech; ¹⁴sac zha ne sca rnee stib diidz, tel so zho gnab zho lo Dios, rien d zho pe nonab zho, loxaque zhiespirituse zho quianee ga. ¹⁵Gacxe waa zeene gnab ne lo Dios, zeene goolniegaa ne me, zac gnee ne stib diidz, per scagaa none gnee ne diidz ne rien ne, mine riengaa grëraa miech. ¹⁶Sac gon, tel stib diidz nonee ne noyoolnie ne Dios, nodeed ne xquizh lo me, ¿zha dien yquiab grëraa zha ne ndxie ni rien d zho pe rnee ne? ¹⁷Niicle ne ndzon sca nodeed ne xquizh lo Dios, per zha ne noquiaadiaga ga, paat yquiinda lo zho.

¹⁸Xquizh Dios, tel naa ye naa rne stib diidz, ni mazdraa gon rne naaw que zha ne rneew lo to i, ¹⁹per zeene zo naa zaatne ndxie grë zha ne noquiaadiag Xtiidz Dios rund naa ne gnee naa stib diidz, sinque rne naa mine guien zho. Rien naa wenraaw gne naa maase gaayaque lan diidz, per mine guien zho, lëdle so naa gne naa tsii mil diidz, ncuuane ni tib choot guien d.

²⁰Bets, bzian, golguien sca golsaan guielmëedlas qui. Zacgaa gac to mëedlas per nëz lo guientseeba, sangue xpensar to golgac zig zha ne biala biinile.

²¹Gotsaa gwi ne ganle zha nac stib diidz. Zhobnee lo Xtiidz Dios rëb me, laa me cxeel miech stib dan, miech ne rnee stib diidz, par gnee zho lo zha Israel; per niicle tsienee zha co, ib guien d zhow. ²²Gase naganle rlu rquiind stib diidz co par grë zha ne rnalole Dios, sinque laaw rquini parne grë zha ne nod xnëz me gan zho ganle nli no me. Zha ne nole xnëz me, zha co rquini gon zho pe nac mine racladz me gacnan zho, pe nac mine zhobnee lo Xtiidz me.

²³Per niicle scaw, telne zob bla zha ne sca gard gliladz Xtiidz me, zobgaa bla zha ne pense rsilo rquiaadiaga, ni csilo to gnee to stib diidz, zeene gan zhow lëëtaa mine guiab zho rzhinle guic to sca rac to. ²⁴Laa telne grëse to no noteed to xtiidz me, nonee to mine racladz me gacnan miech, zha ne sca gard gliladz Xtiidz me, zha ne sca pense rsilo rquiaadiaga, zeene gon zho grëtaa mine nonee to, haxta ziaa zho biini zien zho ne nli tib miech ngoopdol nac zho. ²⁵Zigse quianee to laa zdoo zho lozh yguudz, laa zho

ted yquitsgzhìb zho gnab zho perdon lo Dios; ga guieñ zho ganle ne nli nacie me to.

²⁶Bets, bzian, golguieñ sca zeene ycaalsa to cseed to Xtiidz Dios, zigtaa zha ne goola, zha ne cteed xtiidz Diosa, zha ne gnee stib diidza, zha ne gneegaa zha nac diidz co, none tsienie guic zho mine gun zho ga, laaw yquiiñ parne tsogucraa los demas zho zha racladz Dios gban zho. ²⁷Zeene gnee zho stib diidz, none choptaa zho, tsontagaa zho gneew. None tibga zho gnee, ni rquiin zole zha ne gnee pe nac diidz co. ²⁸Laa telne guieñd zha ne grielo gnee dieñ pe naca, nodne gnee zhow; mazd len zdoose zho gnee zhow, Diosse gon pe nonee zho.

²⁹⁻³⁰Scaque zha ne cteed xtiidz Dios, choptaa zho, tsontagaa zho gneew, laa grëraa zha ne ndxie none yquiaadiag zho mine nonee zho. Telne lëëtaque nonee tib zho, ni csiaab Dios guic stib zho gnee, dzigo none cuëz zha ne quianeele ga zeena grielo gnee zha co. ³¹Sca none gaca, none tibga tibga zho gnee, zeena grëse zha ne ndxie grielo gon zho dieñ pew, parne cseed zho, ni gacnguieelraa zho lo Xtiidz Dios.

³²Zha ne sca rteed xtiidz Dios, none cseed zho gnabey zho zho, cuëz zho nieeda gdziñ hor ne gnee zho. ³³Sac tel Dios, rdziladzd me guiots gnaaz pe cos, rdziladzd me ncuane nzhiitni. Mine rdziladz me zaacse gac tib cos, ni scagaa run grëraa zha ne no xnëz me.

³⁴Ni stiba, zeene sca rcaalsa to, racladz naa guieñ grë men wnaa dzese sob zho. Nodne so zho ye zho gnee, sac gon mgui rnabey zigne zhobneeque lo Xtiidz Dios. ³⁵Ncuane racladz zho gacnan zho, ro yu ga gnabdiidz zhow lo zha bgui, sac gon, rdzieelda lëëpaaze wnaa gnee zaatne rcaalsa to rquiaadiag to Xtiidz Dios. ³⁶Zaacse sca golgac, golguieñ ganle grielod gun to mine notaa guic to, sac gon led loxaque todse nac zha ne runbey Xtiidz Dios, par guiab to zigne racladz to gac tib cos, sca none gaca.

³⁷Mine rne naa lo to nu xtiidz Dios naca, zha ne rteed xtiidz me lo to i, zha ne rapgaa pe stib guieñbiini ne rneedz Espiritu Sant, zha co gunbey ganle nli mine rnabey mew. ³⁸Zha ne gliladzdgaaw, maase gliladzd zhow.

³⁹Sca nagon naca. Goltsoxco sca ygaa to guieñbiini cteed to xtiidz Dios lo miech, zeena gacnan zho zha racladz Dios gban zho; per scagaa, ib ycade to tel cho zha ne rnee stib diidz. ⁴⁰Per zigne rne naa ga, grëse mine gun to none zaacse gun tow, tib tiba gacsew hor ne rieguiala.

Brieëban Jesús

15 Bets, bzian, nu laa naa gbire gzet lo to ganle zha nac Xtiidz Dios. Zigne bialseed naa tow, scataque naca; led yeda rdzëë. Lëëw ga pcaania to, ni haxta niinagaa riladz tow. ²Lëëw rlu zha grielo ycaania Dios to, totsaque nli dib zdoo to bliladz tow, ni bii lëëgaaw rnalo to.

³Zeene bial naa lo to i, pseed naa tow zigne pcaaniase naaw. Gocnan to cho nac Jesús, gocnan to por xtol ne gut me lo cruz, zigne zhobneesew lo Xtiidz Dios. ⁴Gocnan to ganle zeene goc tson ngbidz pqueets zho me laa me

brieeban, zigne raquetaquew lo Xtiidz Dios. ⁵Leñ dze ne brieebanle me ga, gonlo Pedr me, niicle grëragaa zha ne nacgza Pedr bzënie zho me, gonlo zho me sac güeyted me lo zho. ⁶Güey me güeyted me zaatne ndxie ndziibsrää gaay gayoo zha ne nole xnëz me, grëse zho gon me; ndal zha co bii mban niina. ⁷Bded ga gonaque Santiagw me, ni biire güey me lo zha ne bzënie me ga stib; ⁸goc palal tiempa, lega naclew haxta lo naa brieequia me.

Teļ naa gon, rrieequia nac naa zig tib mëed ne rzamëed, ⁹lo grëraa zha ne nac poxtl, ni lalnu peet nond naa, per ni rdzieeld gnee zho naa poxtl; sac gon pa lotaa ptsidil naa grë zha ne glopaa bzëeb xnëz Dios. ¹⁰Per xquizh Dios tibaque noxco me naa, bzooblo me naa, gane laa naa nac minë nac naa niina. Ni led zhlëdgaa bzooblo me naa, sac gon nroobraa xtsiin me noyun naa lo minë noyun grëraa poxtl; per rned naa togo naase quiaayuna, sinque me noyacnie naa rrieelo noyun naaw.

¹¹Laa naa rzet min rii, per nacda par glu dien cho nroobraa noyun xtsiin me, sac minë mazdraa non nac ne noseed no miech Xtiidz me; lëew biadseed no to, ni bliladzgaaw tow.

¹²Nana sca, racladz naa gnë to dien zha nacne no bla to i rnee nlid grieeban mengut; led wen wen name gocnan to brieeban Jesús. ¹³Teļne rnee to nlid grieeban mengut, rrieequia gon rnee to ga nlid brieeban Jesús. ¹⁴Nana teļne brieeband me, paat rquiind minë dzigo noseed no miech nu, zhlëse znu noteed-xtse ne rnalo ne Dios. ¹⁵⁻¹⁶Rrieequia noquidiee no miech, sac gon tibaque rnee no lo zho bleeban Dios Jesús; ni teļne nli rrieeband mengut, ye Jesús dzigo bii noliu me niina.

¹⁷Stiba, teļne nlid brieeban me, zhlëse dzigo rnalo to me ycaania me to; teļne nlid brieeban me, scase bii zëeb to grë xtol to. ¹⁸Grë zha ne bliladz me, zha ne nacle mengut niina, lëe bnitlole zho ga dzigo. ¹⁹Nana teļne loxaque lo guielmban riise nona gnalo ne Jesús, ne dzigo nac miech ne mazdraa nxen.

²⁰Per gacnan to sca ganle, jbrrieeban Jesús! Me nac men ne glopaa brieeban lo grëraa miech guizhiu ne grieeban. ²¹Grëse ne ne nac ne miech, ible laa ne none guet; sac laa guielgut biaan por minë been Adán; per niina ne laa Jesús biaad, por minë been me, grëse mengut laa zho none grieeban. ²²Zigne grëse miech ret porne ziaad zho lo xtiid Adán, scaquegaa grëse zha ne gbig lo Jesús, zgaa zho tib guielmban ndzon.

²³Ible sca none gaca, ndion ne ganle laa Jesús brieebanle, ni zeene laa me guiaad, grë zha ne no xnëz me laa zho grieeban. ²⁴Gal dze co laa me lozh gnitlo mendox ni grëraa ma ne nacie ma, dzigo laa me csan grëse miech ne no xnëz me ladznia Dios men ne nac Pxoaz me; dze cotaaw nagon laa Dios gun guielwxtis. ²⁵⁻²⁶Sac ible Jesús nonabey haxta gdziñ dze co, zeene laa me gnitlo grëse me yozh ne rlëe lo me; zig nac guielgut, lëew nac minë lultm gnitlo me. ²⁷Zigne zhobneeque lo Xtiidz Dios, ladznia me biaan grëtaa ncuaañe no; per guiabd ne togo ye Dios no ladznia me, sac gon Dios nac men ne bdeeda lo me. ²⁸Gacxe waa, zeene gal dze ne laa me sca lozh gnitlo grë zha ne rlëe lo

me, Pxoꝝ me nac meṇ ne gnabey lo me; sac goṇ meṇ co gocnie me been me gan, ni meṇ co nac meṇ ne rnabey.

²⁹Nana, ne rnee to i nliḁ rrieeban meṅgut, ¿pe nac dzigo no zha ne rrobnis xcuent zha ne gutle? ³⁰Telne niaca miṇe nliḁ grieeban meṅgut, ¿pe nac nadien znu gzataa dze quiabeeladz no no lo grē guielxtseeb? ³¹Bets, bzian, nligaaw tel naa goṇ gzataa dze noxtseeb naa lo guielgut; nanle to ganle zeene rne naa rleynie naa to, diidzli rnee naa; scaquegaa niina, miṇe rnee naa nu diidzliw. ³²Ne nligaa zeene glo bial naa guiedz Efés nu, ntseeb goc miech rii lo naa, pale grē ma ntseeb. Telne nliḁ grieeban meṅgut, zhlēse dzigo nodeed naa grē miṇ co; mazd tel zhataa dzigo gban ne, zigne rēbaque diidz ne rēb: “¡Golgotsaa dioow ne, golgotsaa dio ne, benque guielgutse quiambiaaz ne!”

³³Per lēda ga goṇ. Zha ne zienal miṇ co, ib yquiaadiagde to xtiidz zho, zeena gacde to zigne nac zho; zigne zēēbaque diidz: “Telne ndzinliḁ miech ne ctsieelsa luu, zdziṇ dze ne gac luu zigne nac zho.” ³⁴Golquix biini sca, gunctaldraa to xtol to; pe rtoladzde to, gołwi ganle no bla to i gard sēēb xnēz Jesús, haxta ni riend zho zhapaa nac Dios.

Zha grieeban meṅgut

³⁵Nana, no to gnē: “¿Per zha grieeban meṅgut? ¿Zhazhe nac cuerp ne grieebannie zho?” ³⁶¡Aque nxen wnabdiidz col! ¿Pe ranḁe to zig nac grē midz ne rio liu rac bni, rlozhse rnitlo midz co dzigo laa guizh ne naca ga rlan? ³⁷Tel rnee to zha nac cuerp ne grieebannie zho, gołwi ganle zig nac zhobxtil, zig nac grēragaa midz, ¿pe niacxe zigne nacsew riow liu, scasaque naca rlana? Led zeene laaw rlan, guizhle naca. ³⁸Tib midzse naca riow liu, Diosle nac meṇ ne rdeed zhiblaga zigne racladz me. Tib tib midz, psanle me dien zha gluw zeene laaw glan. ³⁹Zigne zhaase zhaase nac tib tib midz, tib tib guizh, scaque nzian lo cuerp no.

Zig nac miech, zhaa nac xcuerp zho lo xcuerp ma, niicle magaaw, zhaa nac xcuerp ma ne no lo liu, zhaa nac xcuerp ma ne no lo nis, ni zhaaque nac xcuerp ma ne rsiibe. ⁴⁰Grē anjl ne no gbaa, zhaa nac xcuerp zho lo xcuerp ne nac ne miech guidzliu; zhaa nac xquielniow cuerp co lo xquielniow cuerp ne no lo guidzliu. ⁴¹Gotsaa gwi ne ganle, zig nac xbiini ngbidz zhaa naca lo xbiini mēē, lo xbiinigaa mel. Niicle melgaaw, zhaase zhaase nac xbiini ma tib tib ma, no ma palalse rlu, nogaa ma rol rna. ⁴²Scadaa nagon, zhaa rlu cuerp ne rap miech niina, ni zhaagaa glu miṇe ygaa zho zeene laa zho grieeban.

Cuerp ne rdziaap ne niina, ncuaane tib rded naca, sangue cuerp ne grieebannie ne gal dze co, led yedraa miṇ co nitlo. ⁴³Mban nac cuerp rii, sac rzacnēw, reta; sangue cuerp ne grieebannie ne, tib cuerp ne gdziṇd dze nitlo gaca. Lega zozhidz cuerp rii, sangue cuerp co tib cuerp ndip ndaan gaca. ⁴⁴Cuerp ne rdziaap ne niina, tib cuerp ngoopdol naca, sangue cuerp ne grieebannie ne, miṇ co gac tib cuerp ne gban zigne racladzpaa Dios. Sac zigne znu no cuerp ne rquiin lo guielmban rii, scaquegaa no miṇe yquiin stib lo guielmban ne gneedz Dios.

⁴⁵ Gol̄soladz gan̄le, rnee lo Xtiidz Dios Adán goc miech ne glopaa biañ ni Dios nac meñ ne bdeed guiẽlmban lo Adán; sangue Jesús, me rap guiẽlmban, ni zrieelo gdeed me guiẽlmban co lo miech. ⁴⁶Scaque nagon, glo rgaa ne cuerp ngoopdoł ne rdziaap ne niina, dzigoraa ygaa ne cuerp ne gban zigne racladzpa a Dios. ⁴⁷Gotsaa gwi ne gan̄le, zeene biañ Adán yudiese bzaa Dios me; sangue Jesús, meñ gbaa nac me. ⁴⁸Gr̄ese ne nac ne miech, cuerp ne rdziaap ne lo guiẽlmban rii, zigne gocdaa xcuerp Adán naca; per zha ne gnalo Jesús, zeene laa zho grieeban laa zho gaple tib cuerp zigne nac xcuerp me. ⁴⁹Masaque nac ne niina zigne goc Adán, ni scaquegaa zdziñ dze ne glu ne zigne rlu Jesús. ⁵⁰Gol̄gacnan̄ sca gan̄le, cuerp ne rdziaap ne lo guidzliu rii, grieelod gdziñ a zaatne rnabey Dios; sac rdziñ dze ne rnitlow, grieelod gaca tib cuerp ne guete.

⁵¹Wen wen gol̄zoobdiag miñe gne naa lo to nu gan̄le, wlaltaa choot gard gacnana: Gr̄ese ne ne nac ne zha ne rnalo Jesús, gal̄ dze co zigtaa zha ne mbana, zha ne gutlegaaw ible stsëë Dios xcuerp ne. ⁵²Znuse gac min̄ co, zig nacse zeene riab tib belye; lëë min̄ co gac lultm vuelt ne ycuedz xanjł Dios zhitrompet zho. Zeene sedz trompet co, hor co gr̄ese zha gut, laa zho grieebannie tib cuerp ne gdziñdraa dze nitlo; scagaa gr̄e zha ne bii zomban, hor co laa xcuerp zho gdzëë. ¡Gr̄ese ne dziaap tib cuerp cub!

⁵³Ible sca none gaca, ib none gdzëë xcuerp ne gaca tib cuerp ne xind, tib cuerp ne gdziñdraa dze nitlo. ⁵⁴Zeene gac min̄ co, ga grieequia mine raquiet lo Xtiidz Dios zaatne rnee: “Nasi laa guiẽlgut bnitlo, guiẽlmbanle nac miñe rnabey. ⁵⁵Ah guiẽlguta, ¿yora na zeene scataa psacsi luu? ¿Yora zeene scataa gocndip xtiidz luu?” ⁵⁶Griee lodraa pe gun̄ guiẽlgut ne hor co, sac led yedraa hor co tso doł, led yedraa hor co gnabey ley; sac por doł gane rrieelo rsacsi guiẽlgut ne niina, ni por ley rlu pe nac xtol̄ ne. ⁵⁷¡Xquizh xquiełnzaac Dios pxeel̄ me Jesús, sac gon̄ por Jesús zrieelo griee ne ladznia guiẽlgut!

⁵⁸Bets, bzian, ne nac to zha ne rleynie naa, gol̄guien̄ sca tibaque dziits gol̄so lo Xtiidz Dios; zig zie dze gołtsoxcoraa gol̄gun̄ xtsiin̄ me, ben̄que nan̄le to gan̄le, gr̄ese xtsiin̄ me miñe rdziuun̄ ne, nacda ncuane zhlëse.

Gon ne guey Jerusalén

16 Laa zig nac gon ne noyaclo guey gac xyudar gr̄eraa zha ne no xnëz Jesús Jerusalén, laa naa rso diidz lo to zigne psoque naa diidz lo zha Galás.

²Tel̄ palal run̄ to gan tib len̄ zhamal, lo co gol̄cob miñe ral zdoo to gdeed to gac gon co; gołtsiesana lo zha ne noyunlow. Adel̄ na gan̄le haxta glansoraa naa i, dzigoraa no to dien̄ zha topa. ³Ni gol̄zoobloga dien̄ bla zha ne tsie tsiesana, na zeene glanso naa i dzigo yquia naa tib guits ne güey zho tsiesan̄ zhow; ⁴ni tel̄ rquiinpagaa ye naa ga, dzigo na maase ga naa ganie naa zho.

⁵Len̄ dze rii no guic naa gateed naa nëz Macedon, dzigo gale grie naa glanso naa lo to i. ⁶Nend zbëz naa lo to i palal dze, togo iquegaa teed naa len̄ mëë nal̄ ne ziaad; ni racladz naa zeene gbi naa i, siguiel̄ to gun̄ to xyudar naa tel̄ pa nëz ne no ga naa len̄ dze co. ⁷Tel̄ne zneedz Dios diidz cuëz naa lo to gr̄e

leñ dze co, zbëz naa, sac racladzd naa tib guialteed naa lo to i. ⁸⁻⁹Niina ne no naa Efés nu, leñ dze riipaa rlu ndal miech ne no liaadz ycaania Xtiidz Dios, gane zbëz naa nu haxta ted Ini Pentecostés. Nligaa ndal zha ne no liaadz co, per scagaa ndalque zha ne rtsidila.

¹⁰Nacle diidz laa Timoté guiaad i; tel nand new naraa guiaad me, golsguiel zeene glanso me zaacse golcaania me, zaacse golcuézlo me, zeena tsonley zdoo me; golgan ganle, ye me quiayun xtsiin men ne rnabey ne. ¹¹Golguien csanwinde to me, sinque golgap me respet; zeena zeene glanso me lo naa nëz rii ine nley gac me csoladz me zha biaadted me lo to i. Laa naa quiambëz glanso me nëz rii, gza me zha ne guiaadnalraa zhits me.

¹²Sangue bets ne Apol, blactaa bnaab naa lo me niaadgza me zha ne ziaad i niaadgan me to, per rzac me grieloda niina. Rien naa zeene gdeedtaaw diidz, ible ziaad me ziaadgan me to.

¹³Bets, bzian, nsin golso, tibaque golnalo Dios. Ib ctsëede to xtiidz to, tibaque goltsoxco tsienal to mine rnabey me. ¹⁴Ncuane guntaa to, golconie guic to gun tow porne rleynie to Dios, porne rleyniegaa to samiech to.

¹⁵⁻¹⁶Laa naa rso diidz lo to, niowse gon golgac lo grë zha bets ne, zha ne run xyudar to i; zig nac Stef grë menlidz me, golgon xtiidz zho. Led nanle to ganle, Stef nac tib men ne glopaa bliladz Xtiidz Dios nëz Gres i grë menlidz me; ni desde dze co laa me pquiabladz tibaque squi quiayun me xyudar grëraa zha ne no xnëz Jesús. ¹⁷Rley naa gon zeene gon naa laa me blanso nu gza me Fortunat ni Acaic, haxta stib goc zdoo naa gocnan naa zha no to, masaque gun naa cuent grële lo to ga gon naa. ¹⁸Ne nligaa bloonley zho zdoo naa, ni rien naa scaquegaa to nley gac to niina zeene gon to zha no naa. Golguien gon zha non nac zho, golwi ganle pa lotaa nac dziin ne quiayun zho.

¹⁹Grëse zha ne no xnëz Jesús nëz Asia nu, laa zho rxeel bdiuzh lo to, golcaania zhibdiuzh zho. Scaque Aquil grop me Priscil, ni grëraa zha ne rcaalsa lidz zho rieseed Xtiidz Dios, grë zho laa zho rxeel bdiuzh lo to. ²⁰Scagaa grë zha ne no nu, ye zho laa zho rquiaabdiuzh to. Zeene ycaalsa to i, ine golnaaznialsa, golqueedzlsa, golcaania zhibdiuzh no.

²¹Nu laa naa cso schop lan xtudz naa lo to, ni golwi ganle naazhal yquiaw: ²²Grëse zha ne gon nëd gleyniepaa Jesús, miech ndziibdeele ga nac zho. ¡Ni ile gon ziaad me! ²³Mese nac men ne gacien to, me nac men ne no zhixco to, sac ne nligaa rleynie me to.

²⁴Niicle naaw rleynie naa to, sac gon tibaque nac ne ngab ne lo me. ¡Lëed bii gdzieel ne sca! *Pabl*